


BAKYUVU MPE BAMVUTU NA ZULU YA HEBREUX KITINI YA II

 Mu ke zola ntete kutonda mosi na mosi ya beno bayina kuzwaka nsangu samu na “kusambila samu na kento ya munu.” Yandi vwandaka kieleka, kieleka ya kubela. Beto vwanada zaba ve yinki ya vwanada, mpe beto zabaka ve yinki kusalamaka, yandi vwanada luka mingi mpe yandi vwanada na kutala vwanada zaba kima ve, mpe vwanada na fièvre pene ya makumi yiya na ndambu, beto zolaka fuka yandi na mavunga ya galasi. Na yawu . . . kasi ntangu yayi yandi kele kaka mbote. Fièvre me manisa, mpe yandi kele mbote. Na yawu yandi kele kieleka ya kulemba mingi, yandi me zimbisa pene ya bakilo yiya na ndambu, mu banza. Yandi kele ve . . . Na nkokila yayi yandi me mina kitini ya yandi ya madya ya ntete katuka Lumingu. Mpe na yawu yandi vwanada kieleka ya kubela, mpe beto salaka kivuvu na Mfumu samu na yandi, mpe Yandi me basisa yandi kuna. Na yina beto ke zola kutuba na beno na kulandila na kusambila ti yandi kuzwa dyaka ngolo ya yandi.

³⁰⁴ Mpe ntangu yayi, na nsuka ya sabala yayi yina ke na kwiza, kana Mfumu zola, mu fwana kwenda na Miami. Nkundi ya munu ya kiboba, Mpangi Bosworth, ke na kukwendaka na Yinzo, mpe yandi me belama na nkama ya bamvula ntangu yayi. Mpe yandi bokilaka munu, yandi tubaka, “Mpangi Branham, kwiza na nswalu kumona munu, mu zola kutuba na nge kima mosi ntete mu kwenda.” Mpe yandi . . . Mbote, mu banza ti yandi zola kusambila samu na munu, mpe kutentika kaka maboko ya yandi na zulu ya munu ntete yandi kwenda, beno zaba.

³⁰⁵ Mpe mu—mu banza ti mu lenda sukisa bilumbu ya munu na nkumbu mutindu F.F. Bosworth. Na bantu nyonso mu zaba na yinza, na muntu nyonso yina mu kutanaka na yinza, mu me kutanaka ntete ve muntu yina mu zolaka mingi kuvwanda mutindu, mutindu F.F. Bosworth; mutindu—mutindu mulongi, yina mu zola kutuba. Mu me kuwaka ntete ve muntu mosi, na yinza ya muvimba, kisika mosi, kusala nsamunu mosi na yina me tala F.F. Bosworth kasi nyonso vwanada kaka “Muklisto,” mpe nyonso “mpangi ya bakala ya kieleka.”

³⁰⁶ “Bakukwenda ya beto ke bikaka na manima ya beto bitambi na zulu ya bazelo ya ntangu.” Yandi kele mpangi ya bakala ya mbote, mpe yandi kele kieleka kiboba ntangu yayi, pene ya nkama ya bamvula. Na yawu yandi ke—yandi ke na kwendaka kaka na Yinzo, ya kele kaka yina, mpe yandi tubaka na munu. Yandi zabaka ti yandi vwanada kwenda, mpe vwanada vingila

kaka. Yandi tubaka ntangu ya yandi ya luzingu ya kulutula kitoko kele kaka ntangu yayi yina yandi ke na kuvingilaka, kasi yandi tubaka ti yandi zabaka ti yandi vwandaka kwenda.

³⁰⁷ Mu tubaka, “Mu fwana kwenda na Michigan sabala yayi, Mpangi Bosworth.”

³⁰⁸ Mpe yandi tubaka, “Mbote, kusala yawu yinda mingi ve, Mpangi Branham, mu ke vwanda mingi dyaka ve. Mu ke na kulembaka bilumbu nyonso.”

³⁰⁹ Na yina yandi vwandaka nkundi ya kulutula mingi samu na munu, mu ke bika ve kukwenda. Ntangu yayi, kana mu fwana kwenda na mpepo, mu ke—mu ke vutuka na mpepo mpe kuvutuka na kutala Lumingu na nkokila; kana ve, mbote, kuna mu fwana kwenda na ditoma, mpe ya lenda baka munu mwa ntangu.

³¹⁰ Mpe beno sambila samu na Mpangi Bosworth. Beno sambila kaka ti Nzambi. . . mpe na yina Yandi ke baka nkooko yayi, ti Yandi ke fidisa kaka kipusu ya tiya mpe kubaka yandi, beno me mona. Mu zola yandi, yandi me vwanda mutindu papa samu na munu.

³¹¹ Kiboba yankaka ya bakala. . . yandi mpe Mpangi Seward. Mu—mu ke na zola mingi na bantu ya kununa, mu—mu zola bawu. Mpe Mpangi Seward, yandi lala mpe, mutindu yina. Kieleka, Mpangi Seward vwandaka mpe ve ya kununa, mutindu Mpangi Bosworth.

³¹² Mpe beno sambila samu na Mpangi Bosworth. Nyonso kele ve roses na kisika yandi kele, kasi ya kele—ya kele. . . Yandi ke na nsatu ya bisambu ya beno, kasi kima ya kulutula ve kasi kaka ya yandi. . . ti Nzambi ke bika yandi kukwenda na ngemba.

³¹³ Ntangu yayi. . . Mpe na manima beto zola kubambuka moyo, mpe, ti mbasi, kana Mfumu zola, beto ke zika mosi ya bankundi ya beto ya dibuundu yayi, Mpangi Sol Coates. Yandi vwandaka vwanda awa bambala mingi, yandi vwanda salaka na poste bamvula mingi. Mpe yandi vwandaka me kufwa na Lupitalu ya ba-Vétéran na nkokila yankaka yina. Mpangi Cox mpe munu kwendaka na kumona yandi, mpe yandi vwandaka. . . kieleka na yisi. Mpe ntangu yayi yandi me kwenda, Muklisto. Mpe beto ke baka nzutu yandi na Yinzo ya Bamvumbi ya Coots na kukwenda zika yandi na manima ya midi na ngunga mosi, Mpangi Neville mpe munu. Kimvuka ya bantu tatu ya Neville ke yimba; mpe beto ke kabula bisalu, Mpangi Neville mpe munu. Ya kele na ntangu beto kubikaka, mu vwanda zaba kaka ve, mpe ya kele samu na Meda. Mpe na yawu, na yina, bisambu ya lufwa ya yandi ke vwanda mbasi na manima ya midi na ngunga mosi, na Yinzo ya Bamvumbi ya Coots.

³¹⁴ Mpe na manima, na ngunga ya zole na manima ya midi, na Kilumbu ya tanu, Tata Wheeler. Beto ke bokilaka yandi Pod Wheeler; yandi kele, mu me zimbana kieleka yina kele

kieleka ya yandi. . . Mpe, beno zaba, mu—mu me mona kaka yawu na mukanda mpe mu vwanda zaba ve nani ya vwandaka, tii mu me zaba. Yandi vwandaka mfinangani ya beto ya bamvula mingi, mpe—mpe yandi me kufwa kaka. Yandi vwandaka kaka awa na mantwala ya dibuundu, nkokila yankaka yina, mpe mu vwanda meka na kukotisa yandi na dibuundu. Nkokila yankaka yina, pene ya basabala tatu me luta, yandi vwandaka kaka ya kutelama kuna, mpe mu vwanda meka kaka na kundimisa yandi na kukota na yinzo-Nzambi. Samu ti, mu banza ve ti yandi vwanda kwendaka na dibuundu to vwanda sadila mosi na mutindu mosi, kasi yandi kele na mwana ya bakala yina kele mulongisi ya Baptiste. Kasi yandi vwandaka sadila ata mosi ve landila yina mu zaba, mpe yandi me kwenda ntangu yayi na kukutana na Nzambi. Na yawu yina ke vwanda na Kilumbu ya tatu na manima ya midi na ngunga ya zole na Yinzo ya Bamvumbi ya Coots. Mpe dyaka, Mpangi Neville mpe bayankaka ke yimba, mpe na bisambu ya lufwa yango kuna.

³¹⁵ Mpe na yawu, kana mosi ya beno ti zola kuvwanda na balukutakanu yango, ya kele mbasi na manima ya midi na ngunga ya zole, to, mbasi na manima ya midi na ngunga mosi. Mu banza ti ya kele ya kulunga. Mutindu yina ve, mpangi ya bakala? Mpe yankaka yina, na ngunga ya zole na manima ya midi. Ya kele kieleka? Na ngunga ya zole, na Yinzo ya Bamvumbi ya Coot.

³¹⁶ Mpe ntangu yayi, Lumingu na suka. . . Na Sabala ya ke vwanda na nsamununu. Mpe Mpangi Neville kukondwa ntembe ke tuba na beno, kuna, kaka yina. . . kana beto ke kuzwa lukutakanu ya lunyakusu Lumingu na nkokila, to na wapi ntangu beto ke vutuka kana beto zyeta na mpepo na—na Florida na kumona Mpangi Bosworth. Mu zaba kaka ve mutindu mu ke bika yandi, yandi kele kaka nkundi mosi ya luzolo ya ntama. Mpe ya kele kukondwa ntembe bantangu ya beto ya nsuka na kukutana, kana, Mfumu pesa muswa na yawu, na zulu ya ntoto. Mpe yandi. . . Mu zaba kaka ve kana mu ke lenda kubika yandi na nswalu to ve; mpe mu zola ve kubika yandi, kasi, beno zaba mutindu ya kele, beno kele na bima yankaka ya kusala.

³¹⁷ Ntangu yayi ya kele na kima mosi mu zola kutuba awa na yina ya kele na bantu mingi ve, mpe na bantu yina kele bankundi ya munu.

³¹⁸ Mu kele na kyese na kumona Mpangi-kento Smith kuna. Ya kele mbala ya ntete mu me mona yandi na kati ya ntangu mingi. Wapi faso Mpangi-kento Smith? Mvula mosi, oh, mu banza mbala ya nsuka mu monaka nge. . . [Mpangi-kento Smith ke na zonza—Mu.] Na Benton Harbor, mu banza kukwenda kuna kilumbu mosi. Ya kele mbote. Mu banza ti mbala ya nsuka mu monaka nge, ya vwandaka na bisambu ya lufwa na Louisville. Mpe mu me bambuka moyo mbote na Mpangi-kento Smith. Mutindu beto. . . Mu vwanda kwenda bakaka yandi na kaminio ntangu beto vwandaka kwiza na dibuundu. Ya

vwandaka vwanda na goudron ya houille na manima ya yawu mpe mapapu ya kaminio vwanda pepaka na zulu mpe na yisi, mpe ya vwandaka na madidi; mpe munu, dikulu mosi ya kuvwanda na ngaanda. Oh, la la. Maza mingi me luta na nzadi katuka kuna, Mpangi-kento Smith. Yinga, tata. Mbote, beto ke tonda Mfumu samu na balubambuku yango ya ntalu, mpe beto zola dyaka Yandi.

319 Kima mosi, muntu mosi lenda kukiyufula, nkokila yankaka yina . . . mu vwanda zonza na Mpangi Fleeman na ngaanda awa na bala-bala. Mpe bantangu yankaka muntu ke tuba, “Na yina kaka lukutakanu ke manisaka, yinki ke salaka kaka Mpangi Branham kukatuka mpe kukwenda?”

320 Beno tala yinki ya kele, kento ya munu kele yandi mosi. Beno me mona? Mpe kana mu kota na kuzonza, mu ke zonza ndambu ya mpimpa, mpe kuna yandi kele, ya kuvwanda kuna yandi mosi bambala mingi. Mpe ya kele samu na yina mu ke salaka nswalu, samu na kuvutuka na yandi, beno me mona, na nkokila; samu ti kana mu kota na kuzonza, mu ke zonza mingi. Mu ke zonza na yandi *yayi* na kati-kati ya ngunga mosi. Mu lenda kwenda kaka ve mpe tuba, “Wapi faso *nge* kele na nkokila yayi? Wapi faso *nge* kele? Wapi faso *nge* kele?” Mu ke salaka yawu ve. Mu ke telama kaka mpe ke kota na kuzonza; mpe muntu ke kota na kuzonza na dyambu, mpe na manima mu kele kuna samu na ngunga mosi. Beno me mona? Mpe ya kele samu na yina, yandi ke vwandaka mpe ke vingilaka mpe nyonso. Mpe ya kele samu na yina. Mu vwanda zola kaka ve ti beno kubanza ti ya vwandaka samu ti mu zola ve kukutana na bankundi ya munu mpe kupesana maboko na bawu, mpe kulakisa kubundana ya beto mpe nyonso yankaka yina, kasi ya vwandaka kaka samu na dyambu ya mutindu yina.

321 Na yawu, ntangu yayi, ti muntu nyonso kuvwanda na kati ya kisambu samu na bantu ya kubela mpe bantu yina ke mona mpasi.

322 Mpe Mama Harvey kele na kati ya mpasi yango nyonso, yandi ke na kukumaka mbote. Yinga, tata. Mpe mu ke mona ve . . . munu . . . Ntangu yayi ya lenda vwanda, landila mutindu mu zaba, muntu mosi, dokotolo awa. Mpe kana mu kele na foti na zulu ya estrade yayi, ti Nzambi kulemvokila munu. Kasi mu ke kwikila ti Nzambi ke sala badokotolo kuzaba dyambu na yina bawu me sala na kento yayi. Mu—mu ke kwikilaka na kupasula, mu ke kwikilaka na bilongo. Kieleka, mu ke kwikilaka yawu. Mu banza ti Nzambi fidisaka bawu awa samu na kusadisa beto, kaka mutindu Yandi fidisaka bisadi-batomabilu samu na matoma mpe nyonso yankaka yina. Kasi ntwenya ya kento yango, dokotolo bikaka yandi kuna, mpe tubaka, “Yandi vwandaka ya kufulukuka na cancer, ya kele ve na kima mosi ya kusala.” Ntwenya ya mama yayi ya nkonga ya bana.

323 Mu kwendaka kuna na yandi, mpe mekaka na kutendula yandi yawu na nzila ya kisambu. . . Mpe—mpe yandi kele kaka ntwenya ya kento, pene ya bamvula makumi zole na tanu. Mpe mutindu ti Nzambi kubelusaka mwa bébé ya yandi, ba ke bokila yandi “bébé ya kimangu” kuna na lupitalu ya bana ntangu yayi, ya méningite. Mpe mwa mwana yango vwandaka na mutindu mosi ya mpasi, mpe Mfumu belusaka kaka yandi mbala mosi. Bawu, badokotolo, vwanda lenda ve na kubakula yawu. Mu kwendaka kuna na Mama Harvey, mpe mu tubaka, “Ntangu yayi, Mama Harvey, badokotolo me bika nge?”

324 “Yinga, tata. Ya kele. . .”

325 Mpe bakala ya yandi kutubaka, “Yinga, ya kele ve na kima ba lenda sala, yandi kele ya kufuluka na cancer.”

326 Mu tubaka, “Mbote, ntangu yayi yina beto ke zola kusala, ya kele kukwikila na Nzambi, ti Nzambi ke—ke belusa. . . belusa nge.” Mpe mu tubaka, “Landila mutindu ya ke kwendila, cancer lenda katuka ve na mbala mosi; kasi kana beto sambila, na manima luzingu ya cancer ke katuka. Beno lenda vwanda dyaka ya kubela mwa ntangu fyoti, mpe—mpe” mu tubaka “beno lenda beluka na mbala mosi.” Mpe mu tubaka, “Na yina na manima ya bilumbu fyoti nge lenda kuma ya kubela ya kulutila.” Kasi mu tubaka, “Nge fwana tula lukwikilu ya nge na kuteleminaka cancer.” Mu tubaka, “Kana cancer kuzinga, nge ke kufwa. Kana cancer kufwa, nge ke zinga.” Mpe mu tubaka, “Ntangu yayi beto ke sambila.”

327 Mpe beto sambilaka, mpe na kimbangi yina mu monaka, Nzambi simbaka nzutu ya kento yayi. Mpe na mbala mosi yandi me kuma mbote, yandi me kwenda mona mama ya munu, yandi me kwenda tala bamfinangani na kizunga, (yandi yina vwandaka na kati ya mpasi ya nene) yandi vwandaka na bampasi ve. Mpe kuna na manima pene ya bilumbu tatu yandi bandaka dyaka na kukuma ya kubela.

328 Mpe na yina ti mbanza tubaka ti bawu “ke futa facture ya dokotolo, kana badokotolo kupasula yandi.”

329 Mpe ntangu yayi kana mu kele na foti, Nzambi lemvokila munu. Kasi bawu bakaka ntwenya ya mama yayi, me sala yandi “kóbáyí”. Bawu nataka yandi kuna, mpe me basisa mpe misopo ya yandi na kifundu, mpe nyonso. Bawu me baka nzila ya masuba mpe misopo, mpe me basisa yawu na balweka. Mpe vwandaka na mesa ya kupasula bangunga yivwa mpe kima mosi. Infirmière ya kento tubaka, “Ya ke talana mutindu na boucherie, kisika bawu vwandaka losa bima ya yandi ya kati kisika na kisika, mpe kutula ovaire ya plastique mpe ba-trompe ya plastique.” Ya kele pwelele, kasi ya kele kieleka. Mpe misopo ya plastique mpe bima mutindu yina, mpe bika kento yayi ya kulala mutindu yina kuna, ntwenya ya mama. Mu ke tuba, na

mutindu ya munu ya kubanzila yawu, badokotolo yina zaba dyambu dyaka na kufwa bantu.

³³⁰ Yandi tubaka na bawu, yandi tubaka, “Mpangi Branham sambilaka samu na munu.” Mpe yandi tubaka, “Beto ke kwikila ti cancer ya beto . . . ti cancer me kufwa.”

³³¹ Yandi tubaka, “Mu kele na bansangu samu na nge, ‘Cancer ya nge kele moyo.’”

³³² Wapi mutindu yandi zolaka tuba yawu? Ya vwandaka na kati, ata radiographie lendaka tuba yawu. Cancer kele . . . Beno lenda tuba ve cancer na nzila ya radiographie, yawu mosi kele nsuni, beno lenda mona yawu ve. Ya kele kaka na kima mosi ya kusala, ya kele kuzibula kento yayi mpe kuzenga yandi na bitini-bitini. Kaka yina. Ntangu yayi kana ya vwandaka ntwenya ya mama, mu zolaka bika yandi kumeka kaka lukwikilu ya yandi na ntuala ya Nzambi na kisika ya kusalaka muntu mosi “kóbáyí” mutindu yina. Ntangu yayi kana mu—kana mu kele na foti, kana mu—kana mu kele na mitifi ya yimbi, mu zola Nzambi kulemvokila munu, beno me mona. Sami ti mu zola ve ti beno kubanza ti mu ke kwikilaka ve na bakupasula to ke kwikilaka ve na badokotolo mpe nyonso. Ya kele nyonso ya kulunga. Kasi mu banza ti beno fwana zaba yinki beno ke na kusalaka ntete beno sosa na kati ya muntu, ve kusadila kaka bawu samu na kuzwa dibanza mutindu yina. Ya kele kieleka. Mpe ntangu yayi, kieleka, yandi lenda zinga ve. Kaka yina. Kana yandi zinga, ya ke vwanza kieleka mosi ya bimangu ya nene yina me salamaka. Ntangu kento yayi me tala na yisi mpe me mona ti misopo ya yandi na lweka mosi, mpe luketo ya yandi fwana kusala na lweka yankaka, yandi me kubwa ngambu mutindu *yayi*, me . . . Samu na yinki, ya vwandaka ve kima . . . mwa ntwenya yango ya mawa vwandaka me kwenda. Mpe kaka mama ya kukula ya bamvula pene makumi zole na zole to makumi zole na tanu na bana tatu to yiya ya kusansa. Ya kele kima mosi ya kulutila kyadi mu me kuwaka na luzingu ya munu. Mu tubaka, “Landila mutindu ya munu ya kubanzila na yawu, dokotolo kele ya kuzaba dyambu samu . . .” Kana yandi bakaka kento yango kaka samu na kuzwa dibanza samu ti mbanza ke futa samu na yawu, kuna ya kele yimbi, ya zolaka pesama ve muswa.

³³³ [Muntu me yufula kana Nzambi lenda vutula kento yango—Mu.] Mbote, mu ke tuba na beno, mpangi, ya kele ve kima mosi yina lenda salama ve. Mpe ya kele—ya kele ve . . . Ya kele—ya kele kima mosi lenda salama, mpe dyaka kieleka. Samu ti mu zaba muntu yina vwandaka na diboko ya kuzengana, na Californie (beno ke talaka nyonso yina na mukanda), ba sambilaka samu na yandi, mpe diboko *yayi* vwandaka ya kuzengana na zulu *awa*, me kula tii misapi ke na kubasika na yawu ntangu yayi; kinkoso ya diboko me kwiza, diboko me kwiza, diboko me kwiza, mpe balweka ya kuningana kuvutukaka na misapi, beno me mona. Ya kele, mu banza na kati ya, *Hérait de la Foi* konso

ngonda. Mpe ntangu yandi kele na maboko ya yandi ya kubasika mutindu *yayi*, ke lakisa yawu kisika diboko ya yandi vwandaka ya kuzengana, kisika yawu me kula. Konso ngonda mutindu yawu ke kulaka, pene ya mvula mosi.

³³⁴ [Mpangi-bakala ke tuba dyaka—Mu.] Kieleka, ya kele kieleka. Mu banza. . . Ya—ya—ya kele kima ya ke salamaka mingi ve, beno me mona, ya kele kieleka kima ya mpasi. Mbala mosi na mwa bantangu mu me kuwaka na yawu. Ntangu yayi, na Mpangi Bosworth, yandi sambilaka samu na kento mosi na nkokila mosi. Mpe mu kuzwaka mosi na lukutakanu ya munu. Kasi ya Mpangi Bosworth vwandaka na mbala mosi; ya munu bakaka mwa bilumbu fyoti samu ya salama.

³³⁵ Yandi sambilaka samu na kento mosi. . . Ntangu yayi, mu tangaka kimbangi ya kento yango. Yandi vwandaka na cancer, na ata mbombo; ya kudyaka mbombo ya yandi. Mpe suka yina landaka kento yango vwandaka dyaka ve na mbombo. Ntangu yayi, mu zaba yayi. . . Ntangu yayi, ya kele ya Mpangi Bosworth, na buku ya yandi *Klisto Munganga*, mu banza, to, *The Joy Bringer*, mosi ya bawu zole. Ntangu yayi, ya kele na kimbangi ya kento yango, na nkumbu ya yandi mpe kisika yandi ke vwandaka. Mpe yandi kele na bamfinangani mpe badokotolo mpe nyonso yankaka samu na kumonisa yawu, ti ya salamaka.

³³⁶ Ntangu yayi, na Little Rock, na Arkansas, nkokila mosi na kivinga, mu sambilaka kuna. . . na Little Rock ve, kasi na Jonesboro. Ti mu sambilaka. . . mu tubaka, “Mu ke vwanda tii mu ke sambila samu na muntu ya nsuka.” Mu vwandaka bilumbu nana mpe bankokila nana na estrade, beno me mona. Mpe na yina. . . mpe kuna na kivinga ya vwandaka na kento mosi yina belamaka, yandi vwandaka na muswale ya yandi na zulu mutindu *yayi*, mpe mu vwanda banza ti yandi vwandaka dila. Mpe mu tubaka. . . Oh, mu banza ti ya vwandaka ngunga ya zole to ya tatu na suka, Mu tubaka, “Kudila ve, mpangi-kento, Nzambi kele Munganga.”

³³⁷ Yandi tubaka, “Mu ke na kudilaka ve, Mpangi Branham.” Yandi me katula yawu; yandi vwandaka ve na mbombo, beno me mona. Badokotolo kutubaka. . . Cancer kudyaka na yisi na mukwa ya mpembe ya yandi. . . ya vwandaka talana. Mpe mu sambilaka samu na yandi, mpe lombaka Mfumu na kubelusa yandi.

³³⁸ Mpe pene ya basabala yiya to tanu katuka kuna, mu vwandaka na Texarkana. Mpe ya vwandaka na bakala mosi ya kulwata mbote ya kuvwanda kuna, yandi tubaka, “Mu lenda kaka kuzwa dyambu ya kutuba, Mpangi Branham?”

³³⁹ Na yina kaka yandi belamaka na estrade, mosi ya ba-huissier mekaka na kuvwandisa yandi swi. Mu tubaka, “Mbote, bika beto mona.”

³⁴⁰ Yandi tubaka, “Nge zaba ntwenya ya mama yayi?”

341 Mu tubaka, “Ve, mu zaba ve.”

342 Kento tubaka, “Kana nge tala foto yayi nge ke zaba yandi.” Mpe yandi vwandaka mubebisi na—na Texarkana, mpe ya vwandaka mama ya yandi na mbombo ya malu-malu yina me mena, kaka ya kusala mutindu yankaka.

343 Ntangu yayi yina ke lakisa ti Nzambi. . . Mu monaka yawu kusalama. Ntangu yayi, Nzambi lenda sala yawu samu na ntwenya ya Mama Harvey. Mpe mu ke na kusambilaka ti Yandi sala, samu ti mwa mama yango ya mawa zola kuzinga.

344 Mpangi Tony, nge kele na dyambu?

[Mpangi Tony me pesa kimbangi ya kubeluka—Mu.] Ya kele kieleka.

Amen. Amen. Yinga, ya kele mbote mpe. Yinga, kieleka Yandi ke sala yawu, Yandi kele Munganga.

[Muntu yankaka me pesa mulabu—Mu.] Yinga. Yinga. Yinga, mpangi-bakala. Amen. Kieleka. Yinga.

345 Mu ke kieleka. . . Mbote, mu banza ti Nzambi ke vutula yawu na nge, mwana, ti nge lenda vutuka kaka na yawu mpe kulakisa yandi. Ya kele kaka kieleka. Ya kele kimbangi samu na nkembo ya Nzambi, mu ke sambila ti Nzambi ke sala yawu. Oh, Yandi—Yandi. . . Kana Yandi kele Nzambi ya Ngolo nyonso, Yandi lenda sala bima nyonso. Kana Yandi lenda sala yawu ve, bima nyonso, Yandi kele ve Nzambi ya Ngolo nyonso.

346 Ya kele na kima yina me sala beto kuvwanda yina beto kele, na mutindu yina beto kele, to beto zolaka vwanda na—na yintu mutindu ndeke, to kima mutindu yina; kana ya vwandaka ve na Dibanza ya nene na manima ya beto samu na kusala mosi na mosi ya beto na mitindu, na kusala yinti ya chène, yinti ya peuplier, diba, mpe—mpe kusala luswaswanu na kati-kati ya bawu landila yina—landila yina bawu kele. Kusala beto ve na. . . bayankaka na mika, mpe bayankaka na mapapu, mpe bayankaka na mpusu, ti beno. . . Beno me mona, ya kele—ya kele Dibanza ya nene na manima ya yawu, ya kele—ya kele yina ke twadisaka yawu. Samu ti Yandi ke simbaka bima nyonso na maboko ya Yandi. Mpe mu zaba ti Yandi lenda sala bima nyonso. Mpe beto ke sambila samu na yawu, beto ke sambila.

347 [Mpangi-bakala mosi ke tuba na Mpangi Branham—Mu.] Kieleka. Beto kele. . .

348 [Mpangi-kento Snyder me tuba, “Mpangi Billy, lemvokila munu.”—Mu.] Yinga, mama, ya kele ya kulunga, landila. [Mpangi-kento Snyder me pesa kimbangi ti yandi kubelukaka na yina Mpangi Branham kusambilaka samu na yandi Lumingu yankaka yina.] Amen. Nge zaba, mu vwanda meka na kubanza, Mpangi-kento Snyder, kilumbu mosi na yina mu vwandaka ya kutelama awa na kupakulama yango, mu banzaka. . . Mu tubaka na Mpangi Cox, Mu tubaka, “Mu ke meka dyaka kaka ve

balukutakanu yango ya kumona mabanza awa na tabernacle.” Oh, nge zaba ve mutindu yina dyabulu ke kwamisaka munu, mpangi ya kento. Wapi mutindu—wapi mutindu yandi ke salaka yawu! Beno zaba, na kutubaka na munu na yina me tala bakuswasikisa yayi ya mabanza.

³⁴⁹ Mpe awa, ya salamaka na kutala ti mpangi ya kento ya Mama Wood awa. . . Mu me monaka ntete ve mosi ya bantu ya bawu. Nkonga ya bawu kubelukaka na ntangu yango, mpe muntu nyonso. . . Mbote, beno zaba, ya vwandaka lutangu ya nene ya bantu yango yina kubelukaka. Mpe na manima. . . Kima ya ngitukulu ntangu yayi: mpangi ya yandi ya kento, mu kudyaka na yandi nkokila mosi, pene ya basabala zole na ntuala ya yawu, . . . Oh, ya kele kuna na myongo na Kentucky, mpe mu—mu zabaka kaka ti yandi vwandaka na ndinga mutindu Mama Wood, mpe ya vwandaka ve na mwinda mingi na kivinga. Mpe mu vwanda kipe ve yandi na mutindu nyonso, mu vwanda, zonza mingi na bakala ya yandi, yandi vwanda kubika madya. Mpe beto basikaka mpe vwandaka na yisi mpe kudyaka; mpe vutukaka na kati, mu vwanda zonza na bakala ya yandi, mu telamaka mpe mu kwendaka. Mpe Nzambi Yandi yina kele Zuzi ya munu kaka zaba (munu ya kutelama na chaire yayi) ti mu bakulaka ata mbala mosi ve kento yango.

³⁵⁰ Mpe kuna na manima kisalu ya kubeluka ya nzutu kumaka na nsuka, mu salaka lubokilu na autel samu na misumuki na kufungula masumu. Mpe yandi vwandaka kieleka ya lunangu na ntuala ya Yawu; mpe yandi balulaka ntima mpe pesaka luzingu ya yandi na Klisto, telemisaka diboko ya yandi ti yandi ke pesa luzingu ya yandi na Klisto, mpe yandi vwandaka dila. Na manima kupakulama nyonso kumanisaka; na kusalaka lubokilu ya munu na autel, mpe nyonso yankaka. Mpe na yina mu vwandaka baluka, mpe awa vwandaka vision, mpe mu monaka mpangi ya yandi ya bakala; ya vwandaka mpangi ya kento, mpangi ya yandi ya kento, mpe bawu kintwadi.

³⁵¹ Mpe mu vwandaka banza ti ya vwandaka kento ya Charlie, samu ti mu zabaka ya kuvwanda na mesa kilumbu yankaka yina, kuna na yinzo ya—ya Charlie. . . Kento ya yandi ya ntwenya, mwa kima mosi ya fyoti, Mfumu lakisaka munu dyambu yina vwandaka na yandi. Mpe katuka kaka ngunga yango, Mfumu simbaka nzutu ya yandi, na yina ya kuvwanda kuna na mesa ya yandi. Tony, kisika beto vwandaka, kuna, samu na kuzomba bampadi. Mpe Mfumu simbaka nzutu ya yandi mpe me katula kima yayi yina yandi zolaka lwata nyonso. . . luzingu ya yandi nyonso, kukatula yawu na yandi; kaka ya kuvwanda kuna. Mpe ntwenya ya kento yayi ntangu nyonso vwanda kudyaka na lweka yankaka ya nsuka ya mesa, kasi bubu yayi, yandi ke belama, mpe ke tula kiti ya yandi kisika yankaka, mpe ke kudaya kaka na lweka ya munu. Yandi vwandaka zaba ve yinki yandi vwandaka sala. Bakala ya yandi ya kuvwanda mutindu *yayi*, mpe Mpangi

Banks ya kuvwanda kuna, mpe beto vwandaka zonza. Mpe yandi me belama, mpe baka kiti ya yandi, mpe me tula yawu awa pene-pene ya munu. Mpe ya vwandaka samu na lukanu mosi, Mfumu lakisaka vision kaka kuna. Mpe mu me bokila bakala ya yandi na ngaanda, samu ti ya vwandaka kimbevo ya bakento, mu me banda na kutuba na yandi na yina kusalamaka. Yandi tubaka, “Mpangi Branham, ya kele kieleka mutindu yawu kusalamaka, kieleka mutindu yina.” Mpe kuna yandi tubaka na yandi, mpe Mfumu belusaka yandi. Mbote mingi.

³⁵² Mpe kuna na manima na nsuka ya lukutakanu ya nkokila mosi yankaka, mpe mpangi yayi yankaka ya kento, mu monaka ntwenya yayi Charles mpe kento yayi kintwadi. Mu banzaka, “Ya fwana vwanda kento ya yandi; kasi kento ya yandi kele na nsuka ya mpembe, kasi kento yayi kele na nsuki ya ndombi.” Mpe mu me tala vision kukatuka samu na nsongi mosi awa. Mpe yandi vwandaka ya kuvwanda kuna vwandaka kusuna meso ya yandi mpe Mfumu kulakisaka vision na manima yandi vwandaka . . . lubokilu na autel . . . na manima na nsuka ya lukutakanu ya kisambu, kubeluka ya bimbevo, mpe lubokilu na autel kusalamaka, mpe Nzambi vingilaka tii yandi balulaka ntima mpe me pesa luzingu ya yandi na Yandi mpe na manima me balula mpe me belusa yandi. Mpe yandi kuzwaka . . . bampasi ya yandi kuvimbisaka yandi bamvula mingi. Mpe yandi me kuma fyoti mingi, mpe nyonso, mpe tii makulu ya yandi me kuzwa mifutu na bisika nyonso vwandaka kimbevo me katuka na yandi (bandikila) na nzutu ya yandi. Yandi ke kuwa mbote mingi kulutila mutindu yandi vwandaka kuwa bamvula me luta, beno me mona. Mpe mutindu Mfumu na lemvo ya Yandi ya ngitukulu kusalaka yawu! Mu banza ya kele landila disolo; mutindu yina ve, Mpangi-kento Wood? Mpe mutindu Yandi salaka! Na manima . . . Yinki nge ke tuba? [Mpangi-kento Wood me tuba, “Yandi me zimbisa bakilo tatu na ndambu sabala me luta.”—Mu.] Bakilo tatu na sabala mosi. Oh, Yandi kele Nzambi, Yandi kele ve?

³⁵³ Ntangu yayi, mu ke tuba na beno, samu na yinki mu tubaka na Mpangi Neville. . . Mu vwanda banza ti yandi zolaka vwanda na nsangu na nkokila yayi. Yandi tubaka, “Ve,” yandi vwandaka na yawu ve. Mpe mu kele na bakyuvu fyoti awa yina bikanaka, mu talaka na mutindu ya kulunga ti mu zolaka kwiza awa mpe kupesa mvutu na bakyuvu yayi. Na yina mu kele na zole to tatu dyaka yina mu banza ti mu ke baka ve na nkokila yayi.

³⁵⁴ Mu zola kulakisa beno bayankaka yina vwandaka me pesama kaka na mulongi. Kaka Mpangi Neville, to, Beeler vwandaka me natila kaka munu yawu. [Mpangi Branham me pesa bamvutu ya bakyuvu nana me landa na Kitini ya III, na kubandaka na nzila ya 67 tii na 74—Mu.]

Yinki ke monikisa matadi na Apocalypse 21:19 mpe na 20?

Tendula bibulu yiya ya Apocalypse 5 . . . Yandi zola kutuba na 6; ya kele ve na Apocalypse 5, ya kele 6, mu banza.

Mpe banani kele bakuluntu makumi zole na yiya?

Yinki vwandaka zola kutuba nsinga ya mbwaki ya Genèse 38?

Wapi kisika ba ke fidisa makabu na yina me tala lufwa ya bambangi zole, na Apocalypse 11?

Wapi kisika ke vwanda basantu na manima ya funda mosi ya bamvula ya ntangu? Mpe wapi mutindu ya nzutu ke vwanda na bawu?

Wapi mutindu beto ke fundisa bawanzio?

Yinki ke kuma nsuki ya bawanzio ya Ntete ya Corinthiens?

355 Beno ke zonzila na yina me tadila baya mbote, bayina kele bakyuvu ya mbote. Na kutala mu lenda baka yawu ve na nkokila yayi, kasi kana Mfumu zola, mu ke meka na kubaka yawu kilumbu yankaka yina beto ke kwiza samu na yawu.

356 Kieleka mu kele na bayankaka ya mbote awa na nkokila yayi; na yawu beto ke sambila kaka ntangu yayi mpe ke lombamba Mfumu na kusadisa beto, mpe beto ke kota mbala mosi na yawu, oh, na baminuti makumi tatu na tanu, baminuti makumi yiya yina ke landa.

357 Ntangu yayi, Tata ya Mazulu ya kusakumuna, beto ke tonda Nge samu na nyonso yina Nge me sala samu na beto. Mpe, oh, ya kele kieleka ngitukulu mutindu lemvo ya Nge me kuma tii na beto. Mu ke na kubanzaka ntangu yayi, na nkokila yankaka yina, kisika mwa mpangi yango ya munu, oh, ya kubela mingi, mpe Nge me baka dyambu. Fièvre ya yandi kubandaka na kubwa na ngunga kaka yina, mpe yandi me kuma mbote ntangu yayi. Mu me tonda Nge. Mpe . . . ke sambila kaka ti Nge ke vwanda na mosi na mosi yina me lombamba kyuvu na nkokila yayi. Mpe beto ke zaba fyoti, tii ntangu yawu ke kuma na yinzo ya beto mosi, yinki ya zola kutuba, mwa kisambu. O Nzambi, yinki . . . wapi mutindu—wapi mutindu ke kuma kieleka. Na ngunga yina ntangu dokotolo ke kwenda, mpe ke tuba, “Mu zaba ve, mu me monaka ntete ve kima mosi kusala mutindu yawu,” mpe kuna Mfumu Yesu ke baka dyambu.

358 O Nzambi, Nge kele kieleka mingi samu na beto, mpe beto kele mingi na kyese samu na yawu. Beto ke sambila Nge na kulemvokila beto na nyonso ya mitindu ya kulemba, mpe mitindu ya beto ya buzoba. Mpe, oh, bambuka kaka beto moyo, Mfumu, ti beto kele bantu ya nsuni na kati ya yinza ya ndombe, yinza ya mpimpa mpe ya masumu mpe ya mpamba. Mpe beto ke na kutalaka na nzila ya vwale, mutindu ya vwandaka, na zulu ya kizizi ya beto, mpe beto ke mona kaka mpe ke zaba mutindu beto ke salaka na kimuntu awa. Kasi kilumbu ntangu vwale yango ke katuka, beto ke mona Nge kizizi na kizizi mpe kuzaba

mutindu beto vwandaka ya kuzabana. Ya kele kilumbu beto ke na kuvingila.

³⁵⁹ Beto ke sambila Tata, ntangu yayi, ti Nge ke sadisa beto na yina beto ke na kuzonza na bantu na Ndinga ya Nzambi, landila bandombolo ya bawu. Katula bimbevo nyonso na beto. Beto kele na nsatu ya Nge, Mfumu. Mpe beto ke sambila ti Nge ke pesa yawu. Ti bamawa ya Nge kupesama na beto, samu ti beto me lombamba yawu na Nkumbu ya Yesu. Amen.

³⁶⁰ Ntangu yayi, na kupesaka bamvutu na bakyuvu, mu kele ve ya kulutila mbote na yinsi, beno zaba. Kasi mu ke pesa kaka mvutu landila luzabu ya munu ya mbote.

³⁶¹ Beno tala yina mu bandaka nkokila yankaka yina, mpe mu zolaka kubika:

60. “Na nzila ya Mpeve mosi beto nyonso kele ya kubotama na nzutu ya Klisto.” (Benoni nyonso ke bambuka moyo ti ya vwandaka na kyuvu yayi mu vwandaka. Ntangu yayi ya kele, kieleka, na Ntete ya Corinthiens 12). . . **Na ntangu beto kele. . . kuzwa lubutuku ya malu-malu, yayi ke salama. Ya kele yayi. . . Yayi kele Mbotika ya Mpeve-Santu, to ya kele mbotika ya manima, to ya kele kifuluka?**

³⁶² Ntangu yayi, ya kele kieleka kyuvu, mpe beto lenda lutisa ntangu ya beto nyonso kaka na zulu ya kyuvu yango, mpe nkokila yayi mpe mbasi na nkokila mpe kulandila mutindu yina. Ya ke fuka. . . ya ke—ya ke baka mpe ke vukisa Biblia ya muvimba kintwadi. Konso Masonuku fwana vukana mbote kintwadi na konso Masonuku yankaka na kati ya Biblia.

³⁶³ Kasi mu ke na kumekaka kaka na kusala yawu kaka nkufi, pwelele mutindu mu zaba mutindu ya kusala yawu, ve; na yina beno ke kwikila na Mfumu Yesu Klisto, kuna beno ke kuzwa lubutuku ya malu-malu. Na yina beno ke kwikila na Mfumu, beno ke kuzwa dibanza ya malu-malu, luzingu ya malu-malu, kasi ya kele ve Mbotika ya Mpeve-Santu. Beno me mona? Beno ke kuzwa lubutuku ya malu-malu na yina beno ke kwikila, beno ke kuzwa Luzingu ya Kukonda nsuka. Ya kele dikabu ya Nzambi yina me pesama na beno na nzila ya kimpwanza ya lemvo na kundimaka dikabu yina Nzambi me pesa na beno. “Yandi—yandi yina ke kuwa Bandinga ya Munu mpe ke kwikila na Yandi yina me fidisa Munu, kele na Luzingu ya Kukonda nsuka.” Yandi kele na Luzingu ya kukondwa nsuka; yina kele lubutuku ya malu-malu, beno me ndima, ya zola kutuba beno me “baluka.”

³⁶⁴ Kasi Mbotika ya Mpeve-Santu ke kotisa beno na nzutu ya Klisto, muntu samu na makabu ya kisalu. Yawu ke kumisa beno ve ya kulutila Muklisto, ya ke kotisa kaka beno na kati ya nzutu ya makabu. Beno me mona? “Ntangu yayi, na nzila ya Mpeve mosi” (Ya Ntete ya Corinthiens 12) “beto nyonso kele ya kubotama na kati ya nzutu mosi. Ntangu yayi,” me tuba Paul, “ya kele na makabu mingi, mpe na kati ya nzutu yayi ya kele

na makabu yivwa.” Mpe na kati ya nzutu yayi. . . Beno fwana botama na kati ya nzutu yango samu na kuzwa mosi ya makabu yayi. Yawu keke na kati ya nzutu.

³⁶⁵ Kasi, ntangu yayi, na yina me tadila kuzwa Luzingu ya Kukonda nsuka mpe kuvwanda Muklisto, beno kele Muklisto na ntangu beno ke kwikila. Ntangu yayi, ya kele ve mukwikidi ya nkumbu, yina kele lukwikilu ya kieleka na Mfumu Yesu mpe kundima Yandi mutindu Mvulusi ya yandi mosi; beno kele ya kubutama dyaka kaka kuna, mpe kele na Luzingu ya Kukonda nsuka. Nzambi ke kota na kati ya beno.

³⁶⁶ Ntangu yayi beno tala mbote, Luzingu ya Kukonda nsuka; Yesu tubaka, “Yandi yina ke kuwa Bandinga ya Munu mpe ke kwikila na Yandi yina me fidisa Munu, kele na Luzingu ya Kukonda nsuka, mpe ke kwiza ve na lusambusu kasi me luta lufwa na Luzingu.” Beno kele kaka kuna kivangu ya malu-malu. Paul kutanaka kuna bayankaka ya bantu yango, kuna na Actes 19. Bawu vwandaka na mulongi kuna yina vwandaka muntu ya musiku na nkumbu ya Apollos. Mpe Apollos vwandaka muntu ya ngolo na Masonuku, mpe yandi vwandaka monisa na nzila ya Masonuku ti Yesu vwandaka Klisto. Beno me mona?

³⁶⁷ Ntangu yayi beno tala mbote. Apollos, na nzila ya Ndinga, vwandaka monisa na nzila ya Ndinga. “Lukwikilu ke kwizaka na nzila ya kuwa, kuwa Ndinga. Yandi yina ke kuwa Ndinga ya Munu, mpe ke kwikila na Yandi yina fidisaka Munu, kele na luzingu ya kukondwa nsuka.” Beno me kuzwa yawu? Apollos, na nzila ya Ndinga, vwandaka monisa. Mpe bayayi vwandaka Miklisto, bawu vwandaka bayina vwandaka landa, bilandi. Mpe Apollos vwandaka monisa na nzila ya Ndinga, ti Yesu vwandaka Klisto. Mpe bawu vwandaka na kyese ya nene mpe kuzwaka Ndinga, kasi kuzabaka kaka mbotika ya Jean.

³⁶⁸ Mpe na yina Paul kulutaka na basimu ya zulu ya Éphèse, yandi talaka bilandi yayi mpe yandi tubaka, “Beno kuzwaka Mpeve-Santu *ntangu* beno kwikilaka?” Beno me mona?

³⁶⁹ Ntangu yayi, na yina beno ke kwikila, Yesu tubaka, “Beno kele na Luzingu ya Kukonda nsuka.” Yina kele lubutuku ya malu-malu. Yina kele kundima ya beno, kusoba. Kasi Mbotika ya Mpeve-Santu kele ngolo ya Nzambi na kati ya yina beno kele ya kubotama mpe muntu ya makabu yivwa yayi ya kimpeve yina ke sala na nzila ya nge; mutindu, kulonga, ba-évangéliste, bantumwa, ba-pasteur, bapofete, . . . mpe makabu nyonso ya nzutu ke kwiza na yayi, na yina beno me botama na kati ya nzutu yayi. Mpe ya kele. . . ke sala beno ve Muklisto mosi ya kulutila, ya ke tula kaka beno na kisika na kisika samu na kuvwanda mpeve yina ke sala na kati ya Dibuundu ya Nzambi ya moyo. Ntangu yayi beno me bakula yawu? Beno me mona?

³⁷⁰ Ntangu yayi kyuvu kele. . . Beto pesa mvutu na yawu kaka mosi na mosi, ya kele na bakyuvu tatu.

“Na nzila ya Mpeve mosi beto nyonso kele ya kubotama na kati ya nzutu ya Klisto.”

Ya kele kieleka, Corinthiens ya Ntete kapu ya 12 ke pesa mvutu na yawu. Mbote mingi.

Na ntangu yina beto ke kuzwa lubutuku ya malu-malu, yayi ke salama? Ya kele na ntangu yina?

³⁷¹ Ya kele yina bawu zola kuzaba, yinga . . . “Na nzila ya Mpeve mosi . . .” Ve. Ve. “Na nzila ya Mpeve mosi beto nyonso kele ya kubotama na kati ya nzutu mosi.” Beno me mona, ya kele ve ntangu lubutuku ya malu-malu ke bandaka, lubutuku ya malu-malu ke bandaka ntangu beno ke *kwikila* na Mfumu Yesu.

³⁷² Ntangu yayi beno mona, ya kele ve . . . ya kele ve na kima mosi . . . Ntangu yayi beno kuwa. Yinki beno lenda sala kukondwa kukwikila? Yinki ya kulutula beno lenda sala? Yinki beno lenda sala samu na yawu dyaka kana kaka kukwikila yawu? Beno tuba na munu kima mosi mu lendaka sala. Ya kele ve na kima mosi yina beno lenda sala na ngaanda ya kukwikila Yawu. Ntangu yayi, kana kima basika na ngaanda ya kukwikila ya beno, ya kele ve kisalu ya beno mosi, ya kele kisalu ya Nzambi. Na yawu . . .

³⁷³ Ntangu yayi kana beto lenda tuba ti ntangu beno . . . Bambala mingi mu me monaka, na bambala mingi, bantu kundima “kimbangi ya ntete ya kuzonza na bandinga” mutindu Mpeve-Santu. Mpe bantangu yankaka kuningisa bantu, to kubula bawu mpe mwa kubula bawu, na kutubaka, “Tuba yawu. Tuba yawu. Tuba yawu. Tuba yawu.” Beno zaba, kuvutukila dyambu mbala na mbala, “Tuba yawu. Tuba yawu. Tuba yawu.” Beno me mona, ya kele kima beno ke na kusalaka beno mosi. Mpe—mpe—mpe ya ve . . . ya ke ve . . . ya—ya kele kima mosi ve. Beno lenda kota na mvusu na bandinga. Beno lenda kuzwa bima mingi, mpe ba-sensation. Kasi kana kima kubasika na ngaanda ya lukwikilu ya beno mosi, ya fwana vwanda dikabu ya Kinzambi yina Nzambi me pesa beno. Beno me mona?

³⁷⁴ “Mpe na nzila ya Mpeve mosi beto nyonso kele ya kubotama na kati ya nzutu mosi.” Ya kele kieleka, beno me mona. Mbotika ya Mpeve-Santu kele kisalu ya kuswaswana na lubutuku ya malu-malu. Mosi kele lubutuku, mosi kele mbotika. Mosi ke nata beno Luzingu ya Kukonda nsuka, yankaka yina ke pesa beno ngolo. Ya ke pesa ngolo na Luzingu ya Kukonda nsuka, beno me mona, samu na kusala. Ntangu yayi beno me bakula yawu? Ok. Mbote mingi.

³⁷⁵ Ntangu yayi awa kele na yankaka, ya zole, ya mbote ti mu kele na yawu mutindu na nkokila yina:

61. Wapi kisika vwandaka Mpeve ya Yesu ntangu nzutu ya Yandi kuvwandaka na ndyamu bilumbu tatu? Wapi kisika vwandaka Mpeve ya Yandi?

³⁷⁶ Ntangu yayi, mpeve ya Yandi, kana beno ke landa Masonuku, . . . mbote, beto lenda nata kaka bisika mingi. Kasi, mu ke kumiyufula, nani keke na Biblia? Mpangi Stricker, nge keke na Biblia? Mbote mingi. Mpangi Neville, nge keke na mosi? Baka samu na munu Psaumes 16:10. Mpe nani dyaka? Mpangikento Wood, nge keke na Biblia kuna? Mbote, Mpangi Stricker, (mbote mingi, mosi to yankaka), baka samu na munu Actes 2:27, Actes 2:27.

³⁷⁷ Mpe ntangu yayi, kisika ya ntete, ntangu Yesu kufwaka . . . Ntangu beno ke kufwa, nzutu ya beno ke kufwa. Mpova *lufwa* zola kutuba “kukabuka,” kaka kuvwanda ya kukabuka na baya nge ya luzolo. Kasi awa Yandi ke tuba yayi, na Santu Jean, na kapu ya 11, “Yandi yina ke kuwa . . .” Ve . . . Beno lemvokila munu; ya keke na Santu Jean 5:24, “Yandi yina ke kuwa Bandinga ya Munu keke na Luzingu ya Kukonda nsuka.”

³⁷⁸ Yesu tubaka na Marthe, yandi yina kwizaka na kukutana na Yandi, . . . Yandi tubaka, “Kana Nge zolaka vwanda awa, mpangi ya munu ya bakala zolaka kufwa ve. Kasi mpe ntangu yayi, nyonso yina Nge ke lomba na Nzambi, Nzambi ke pesa yawu na Nge.”

³⁷⁹ Yandi tubaka, “Mu keke Mvumbukulu mpe Luzingu.” Benome mona? “Yandi yina ke kwikila na Munu, ata ti yandi vwanda ya kufwa, dyaka yandi ke zinga; mpe muntu nyonso yina ke zinga mpe ke kwikila na Munu, ke kufwa dyaka ve.”

³⁸⁰ Ntangu yayi—ntangu yayi, ya keke na ndambu ya beto yina ke kufwaka ve. Mpe kaka mutindu mu vwandaka me lutila na ndandani ya Masonuku, nyonso yina keke na mbandukulu keke na nsuka. Bima yina keke ve na mbandukulu, yawu keke ve na nsuka. Na yawu ntangu beto ke ndima Klisto, Nzambi, beto ke kuma bana ya babakala mpe bana ya bakento ya Nzambi, mpe Luzingu ya beto keke kaka ya kukonda nsuka mutindu Luzingu ya Nzambi keke ya kukonda nsuka; beto keke na ya Kukonda nsuka.

³⁸¹ Ntangu yayi, mpova *kukondwa nsuka*, beto talaka yawu. Mpova *kukondwa nsuka* keke “kitini mosi ya ntangu,” *kukondwa nsuka mpe* (kuvukisa) *kukondwa nsuka*. Mpe beto ke tala awa ti ya keke—ya keke na nsuka, kaka mutindu bampasi nyonso, mpe bimbevo nyonso, mpe mawa nyonso, mpe bitumbu nyonso, mpe difelo yawu mosi keke na nsuka.

³⁸² Kasi Luzingu ya Kukonda nsuka ya keke na ata nsuka ve, samu ti Yawu keke na ata mbandukulu ve. Yawu lenda ata mbala mosi ve kufwa samu ti Yawu ata mbala mosi ve kubutamaka. Yawu keke na ata mbandukulu ya bilumbu, Yawu keke na ata nsuka ya ntangu. Ntangu yayi, mutindu kaka yina beto lenda zinga ya Seko, ya keke na nzila ya kuzwaka kima yina keke ya Seko. Mpe Nzambi vwandaka; ntete ya vwanda na kima mosi, ya

vwandaka na Nzambi. Nzambi ata mbala mosi ve me kuzwaka mbandukulu to nsuka.

³⁸³ Mpe Nzambi vwandaka Mpeve yayi ya nene. Beto monikisaka Yandi mutindu bantinta sambwadi ya arc-en-ciel yina ke fukaka . . . mukyama zolaka fuka kieleka ntoto kana yawu vwandaka simba ntoto ve. Ya kele kaka maza na kati ya selekele ya kufutama ya ntoto, yina ke sala yawu. Kasi, ntangu yayi, mutindu Nzambi kele Kukonda nsuka, mpe Yandi vwandaka ya Kulunga: luzolo ya kulunga, ngemba ya kulunga, kyese ya kulunga, nsayi ya kulunga. Bampeve sambwadi yango nyonso (mutindu beto ke tala yawu na Apocalypse), yawu me basika; ya kele yina salaka Nzambi, ya vwandaka kulunga. Nyonso yankaka na ngaanda ya yawu me vwanda kima yina ba me bebisa na Yawu.

³⁸⁴ Ntangu yayi mutindu kaka yina beto lenda vutuka na ya kulunga, ya kele kuvutuka na Yawu (na kulunga, yina kele Nzambi). Kuna beto ke kwiza na ya kulunga, na manima beto ke kuzwa Luzingu ya Kukonda nsuka; kukondwa nsuka, to kukondwa—kukondwa kima, ya kele kaka Luzingu ya Kukonda nsuka samu na ntangu nyonso.

³⁸⁵ Ntangu yayi yandi ke na kuzonzaka na moyo . . . mpeve. Samu ti beto ke tulaka na ntoni banzutu ya basantu ya kulutula na kati-kati ya beto, samu na nzutu yayi. Mpe nzutu . . . Na kisika ya ntete, ntangu Nzambi, Logos yina basikaka na Nzambi . . .

³⁸⁶ To, mutindu mu vwandaka me kota na yawu, Katolika ke bokila Yawu, “bumwana ya Kukonda nsuka ya Nzambi.” Na yina, mutindu mu vwandaka me tuba ntete, ndinga mpe ke salaka ve dyambu. Beno me mona, ya lenda vwanda ve na mwana ya Seko, samu ti mwana zolaka kuzwa mbandukulu. Mpe na yawu Yesu kuzwaka mbandukulu, Nzambi kuzwaka ata mbandukulu ve. Beno me mona? Kasi Mana vwandaka . . . ve bumwana ya Seko, kasi Mwana yina vwandaka na Tata na mbandukulu vwandaka Logos yina basikaka na Nzambi.

³⁸⁷ Mpe ya vwandaka théophanie ya Nzambi yina basikaka. Mutindu ya muntu yina kuzwaka ve meso mutindu beno na kumona; kumonaka mbote. Yandi vwandaka ve na makutu mutindu beno na kuwa, kasi vwanda kuwa mbote. Beno me mona, Yawu vwandaka théophanie, ti, mukyama nyonso yayi me kulumuka na kati ya théophanie. Moïse kumonaka Yawu ntangu Yawu kulutaka na ditadi mutindu yina. Yandi monaka balweka ya manima, tubaka, “Yawu ke talana mutindu muntu.”

³⁸⁸ Abraham kumonaka Yandi ntangu Yandi Yandi kukotaka na nzutu ya muntu mpe kudayaka mwana yango ya ngombe, kunwaka mwa miliki, kudyaka manteka. Abraham kumonaka Yandi ntangu Yandi kotaka, mpe na manima me zimbana mbala mosi. Beto talaka ti banzutu ya beto kele ya kusala na bima kumi na sambanu ya ntoto, yina ke vukanaka kaka kintwadi.

Mpe Nzambi tulaka yawu kintwadi, mpe tulaka Bawanzio zole na banzutu yayi; Bawanzio yina telamaka mpe vwandaka zonza. Mpe Bawanzio vwandaka bantu na mosi. . . mpe na ntangu yina.

³⁸⁹ Ntangu yayi beno tala, beto talaka ti, Nani vwandaka Melchisédek kasi Nzambi Yandi mosi! Ya zolaka vwanda muntu yankaka ve, samu ti Yandi vwandaka Ntinu ya Salem yina kele Jérusalem. Yandi vwandaka na ata tata to mama; ya zolaka vwanda ve Yesu, samu ti Yandi kuzwaka tata mpe mama. Yandi vwandaka ve na mbandukulu ya bilumbu, ata nsuka ya luzingu; ya kele kaka na Mosi yina kele na yawu, ya kele Nzambi. Ya vwandaka Nzambi yina vwandaka zinga awa na kati ya théophanie. Beno me mona? Beno tala, Ntinu ya Salem.

³⁹⁰ Ntangu yayi, Nzambi me zinga nzila nyonso ya nsungi, na nzila ya bantu ya Yandi. Ya vwandaka Nzambi yina vwandaka na kati ya David, yina salaka yandi kuvwanda na zulu ya mongo, mpe mutindu ntinu ba me losa, mpe vwandaka dila. Mpeve mosi yango kutalanaka na kati ya Yesu Mwana ya David, Yandi yina ba mangaka na Jérusalem mpe dilaka.

³⁹¹ Joseph, ya kutekama na bambongo makumi tatu ya kisengo, ya kuyinama na mpangi ya yandi ya bakala, ya kuzola na tata ya yandi, vwandaka vwanda na diboko ya bakala ya Pharaon, mpe ata muntu ve zolaka kwiza kana. . . kuluta na Joseph, mpe mpungi vwandaka wakana mpe konso dikoto zolaka fukama na ntwala ya Joseph: kifwanukusu ya kulunga ya Klisto. Ya vwandaka Mpeve yango ya Klisto yina vwandaka zinga na nzila ya bantu yango. Beno me mona?

³⁹² Na yina, ntangu yayi awa ntangu Yesu kufwaka, ya vwandaka Nzambi yina talanaka na kati ya nsuni. Nzambi kumaka muntu. Na misiku ya mpulusu, mutindu kaka ti muntu zolaka vulusa kima ya kuzimbana ya Israël, yandi zolaka vwanda mpangi. Yandi zolaka vwanda mpangi ya pene-pene. Buku ya Ruth ke tendula yawu na mutindu ya kitoko; mpe yandi zolaka vwanda mpangi. Na yawu Nzambi zolaka kuma mpangi ya muntu, samu ti muntu zolaka kuma mpangi ya Nzambi. Beno me mona?

³⁹³ Yandi kele na mpeve na kati ya yandi, muntu kele na yawu ntangu yandi ke butukaka, samu ti ya kele mpeve ya yinza. Ya kele mpeve ya yinza, ya kele mpeve ya nzambi ya yinza yayi. Yandi kele kaka nkuna ya Adam.

³⁹⁴ Yinti ke butanaka yawu mosi. Bayinti ke butanaka yawu mosi. Bibulu ke butanaka bawu mosi. Bantu ke butanaka bawu mosi. Bawu kele kivangu na nzila ya luvangu ya ntete. Beno me bakula yawu?

³⁹⁵ Na yina, ntangu yayi ntangu muntu ke butama, yandi ke butama na mpeve na kati ya yandi ya yinza yayi. Ya kele samu na yina yandi fwana kubutuka dyaka. Samu ti mpeve yayi me katuka na mutindu ya tata mpe mama, yina

vwandaka na mutindu ya kuvukisa banzutu, mpe kieleka zolaka zinga ve ntangu nyonso. Na yawu yandi fwana butuka dyaka. Mpe ntete yandi kusala yawu, Nzambi zolaka kulumuka mpe kusala nzila samu na yandi na kubutuka dyaka; samu ti yandi vwanaka na ata nzila ya kuvulusa yandi mosi, yandi vwanaka kukondwa kivuvu. Yandi ve...kukondwa kivuvu, kukondwa Nzambi, kukondwa Klisto, na yinza, ya kuzimbana mpe ya kufwa. Yandi—yandi...ya kele ve na kima yandi zolaka sala samu na kukivulusa yandi mosi. Yandi...konso...Ata kana yandi vwanaka ngang-Nzambi ya ntete, kana yandi vwanaka évêque, kana yandi vwanaka paapa, nyonso yandi vwanaka, yandi kele kaka ya kuzaba dyambu mutindu muntu yina ke landa.

³⁹⁶ Na yawu, ya zolaka lomba Yandi yina vwanaka ve ya kuzaba dyambu, samu na kusala yawu. Mpe Yandi yina vwanaka ve ya kuzaba dyambu vwanaka Nzambi Yandi mosi. Mpe Nzambi zolaka kulumuka mpe kukuma muntu (mpe Yandi kwizaka na mutindu ya Klisto) samu na kukotisa ntunga ya lufwa, samu na kukatula ntunga ya lufwa, samu na kuvulusa beto, ti beto...ve samu na bisalu ya beto to samu na bambote ya beto (beto kele na ata mosi ve), kasi samu na lemvo ya Yandi, na kuzwa mpulusu. Na yina beto ke kuzwa Luzingu ya Yandi na nzutu yayi yina ke kufwa, mpe ntangu yayi beto kele bana ya babakala mpe bana ya bakento ya Nzambi, mpe kele na Luzingu ya Kukonda nsuka na kati ya beto. Beto kele bana ya babakala mpe bana ya bakento ya Nzambi. Na yawu, Yesu, na kuvwandaka ya moyo...

³⁹⁷ Mpe ata muntu, ata mutindu yimbi to mutindu mbote, ntangu yandi fwana...ntangu yandi ke bika ntoto yayi, yandi kele ve ya kufwa. Yandi kele kisika mosi yankaka. Kasi yandi kele na luzingu yina ke kufwa, na manima ba me semba yandi na difelo samu na bisalu ya yandi, yandi...kasi dyaka luzingu yango fwana kusuka. Ya kele kaka na mutindu mosi ya luzingu ya Kukonda nsuka.

³⁹⁸ Ntangu yayi, beto vwanaka me tala na yawu. Kana muntu lenda vwanaka musumuki mpe ya kuvwanda ya kusemba ya kukondwa nsuka...Yandi lenda vwanaka ve ya kusemba ntangu nyonso kana ti yandi kele na Luzingu ya Kukonda nsuka. Kana yandi kele na Luzingu ya Kukonda nsuka, yandi me vuluka. Beno me mona? Na yawu ya kele kaka na mutindu mosi ya Luzingu ya Kukonda nsuka, mpe ya kele *Zoe*, "Luzingu ya Nzambi." Mpe yandi lenda kufwa ve.

³⁹⁹ Kasi bantu ya yimbi kele na kisika ya—ya kuvingila (na kisika ya nkwasusu) samu na lusambusu ya bawu (samu ba fundisa bawu landila bisalu bawu salaka na nzutu) na kilumbu ya nsuka. Ntangu yayi, kasi beto...Bantu yankaka masumu ya bawu ke kwendaka na ntwala ya bawu, ya bayankaka ya ke landaka na manima ya bawu.

400 Ntangu yayi kana beto funguna masumu ya beto, Yandi kele ya kulunga samu na kulemvokila beto, na yawu beto ke telama ata mbala mosi ve na lusambusu ya Nzambi. Beno me bakula yawu? Beno tala, Romain 8:1, “Na yawu ya kele na ata kitumbu ntangu yayi samu na bawu yina kele na kati ya Klisto Yesu.” Bayina kele KATI ya Klisto. Bayina me luta lufwa na Luzingu; beno me mona, beto kele na ata kitumbu mpe vwandaka na kati ya Klisto Yesu. “Bayina ke tambula ve landila nzutu, kasi landila Mpeve.” Beno mona? “Yandi yina ke kuwa Bandinga ya Munu, ke kwikila na Yandi yina fidisaka Munu, kele na Luzingu ya Kukonda nsuka.”

401 Mpe kana mu me ndimama na kati ya Klisto, mpe ti Klisto kubakaka lusambusu ya munu, mpe mu me ndima munkayulu ya Yandi samu na masumu ya munu, wapi mutindu Nzambi lenda sambisa munu? Yandi sambisaka munu yimeni, ntangu Yandi sambisaka Klisto. Na yina mu kele na kimpwanza na lusambusu. “Na yina ntangu mu ke mona Menga, Mu ke luta na zulu ya beno.” Beno me mona?

402 Kasi, ntangu yayi, muntu ya yimbi kele mutindu yina ve. Yandi ke kota na kisika ya nkwamusu. Mpe beto zaba ti ya kele kieleka. Muntu ya yimbi kele moyo. Yandi kele na kisika ya nkwamusu. Yandi kele na kisika yandi zaba ve. . . Ya kele mutindu bantu ya bampeve yayi mpe ba-medium ke bokilaka bampeve yayi ya bantu yina kufwa, ya kele mutindu kuseka mpe bansaka ya mvindu mpe bima bawu ke bula, kana beno me monaka ntete mosi ya yawu. Mbote mingi. Samu na yinki? Bawu ve. . .

403 Beno tala Ma Piper yayi, ntete mukanda ya munu ya *Kimangu ya Donny Morton* kubasika. Bantu yikwa tangaka mukanda yango? Yinga, mingi ya beno kutangaka, kieleka. Mpe ya kele na *Reader's Digest*. Beno me mona? Kaka ntete yawu, basikaka Mama Piper, muntu ya kimpeve ya kulutila nene yina yinza kuzabaka ntete ve. Ba-page kumi na zole kupesamaka na disolo ya yandi. Mpe bamvula makumi tanu. . . Bawu kuzwaka yandi bisika nyonso na yinza, mpe na bimbangi ya science mpe nyonso, ti “yandi kieleka vwandaka zonza na mafwa, mpe bantu yango vwandaka kwiza.” Yinki? Nkumbu ya Nzambi vwandaka ya kutanga ata mbala mosi ve, ata kubalula ntima ve, ata kubeluka ya Kinzambi ve, kima ve na yina me tala Yawu, beno me mona.

404 Kima kaka ya vwandaka, yina bantu yango vwandaka tanga vwandaka, “Jean, nge zaba munu ve? Mu kele George yina vwanda vwandaka na kisika *mosi*, mpe mu salaka *yayi-mpe-yayi* mpe *yayi-mpe-yayi*. Nge ke bambuka moyo na kisika beto kwendaka mpe salaka yayi?” Beno me mona, ya kele nyonso bawu zaba. Bawu kufwaka. Me sabuka. . . Bawu kele—bawu kele kima ve me bikana kasi lusambusu.

⁴⁰⁵ Kisika yinti ke tengamaka, ya kele kisika yawu ke kubwaka. Mpe kitezo na yina beno ke kufwa... Ya kele samu na yina mu ke mangaka kusambila samu na bantu ya kufwa, beno me mona, lombilu ya bisambu to—to kominyo ya basantu mpe nyonso yankaka yina. Ya lenda vwanda ve, landila Ndinga ya Nzambi. Ya ke salaka ata mbote ve samu na kusambila na muntu nyonso na manima bawu me kufwa. Yimeni samu na bawu. Bawu kele. . . bawu me. . . Bawu me sabuka ndilu ya mawa mpe lusambusu. To bawu me kwenda na kyadi, to me kwenda ntama ya mawa. Yesu tubaka yawu, na kapu ya 16 ya Santu Matthieu, Yandi—Yandi—Yandi tubaka yawu; na kapu ya 16 ya Marc, mu banza ya kele. Muntu ya mvwama mpe Lazare; muntu ve lenda sabuka dibulu yayi, mpe lenda ata mbala mosi kusabuka yawu! Beno bawu yayi. Beno me mona? Na yawu yina me sukisa dyambu.

⁴⁰⁶ Ntangu yayi, kasi ntangu Klisto kufwaka, nyonso zolaka pesa kimbangi ti Yandi vwandaka Klisto. Ntangu yayi beto kwenda na kyuvu ya beno. Kima ya ntete, bambwetete kumangaka na kupesa nsemo, mwini kotaka, ngonda zolaka ve kupesa nsemo ya yawu, ntoto me luka matadi ya yawu, na lufwa ya Yandi. Mpe Yandi kwendaka mpe longaka na myoyo yina vwandaka na boloko, bayina balulaka ntima ve na mvibudulu na bilumbu ya Noé. Bawu, zolaka bakula Yandi. Beno tala yawu! Mpe kana ya kele na siansi na musumuki awa na nkokila yayi, beno banza na zulu yawu minuti mosi. Kilumbu Nsangu ya mbote yayi yina beno ke na kuwaka kulonga kaka ntangu yayi, beno ke pesa kimbangi na Yawu. Na kisika mosi beno ke fukama, ata nani beno kele. Ya lendaka vwanda kumi ya mafunda ya bamvula katuka bubu yayi, ya lendaka vwanda ve tii. . . na suka. Ata kisika ya kele, beno ke fukama kisika mosi, mpe beno ke kuwa Nsangu mosi yayi kulongama kaka na manima ya beno.

⁴⁰⁷ Samu ti na manima myoyo yango kuvwandaka na boloko, bayina balulaka ntima ve ntangu Enoch mpe ntangu bawu nyonso kulongaka, mpe Noé. . . mpe samu na mvibudulu ya Nzambi, mutindu ya kele ntangu yayi, na kuvingilaka samu na ntangu yango kukwiza. Mpe Noé mpe Enoch mpe bawu nyonso kulongaka, mpe bantu yango vwandaka seka mpe vwandaka vwenza bawu. Mpe bawu vwandaka na yinzo ya boloko, mpe Yesu kwendaka mpe longaka na myoyo yina vwandaka na boloko. Yandi pesaka kimbangi! Mazulu kupesaka kimbangi ti Yandi vwandaka, ntoto kupesaka kimbangi ti Yandi vwandaka, difelo kupesaka kimbangi ti Yandi vwandaka!

⁴⁰⁸ Biblia ke tuba ti ya. . . David, bamvula mingi na ntwala, na Psaumes. . . Mbote mingi, Mpangi-bakala, tanga Psaumes, lemvo kuna. Psaumes 16:10. [Mpangi Neville ke na kutangaka Masonuku—Mu.]

[Samu ti nge ke bika ve moyo ya munu na difelo; to dyaka nge ke bika ya Nge ya Santu kumona kupola.]

409 Tanga kima mutindu mosi, mpangi-bakala, na kisika Pierre kulongaka, na Actes, na kapu ya 2, na nzila ya 27. [Mpangi Stricker ke na kutangaka Masonuku—Mu.]

[*Samu ti nge ke bika ve moyo ya munu na difelo, to dyaka nge ke bika ya Nge Santu kumona kupola.*]

410 Tanga banzila zole yina kele na zulu ya yawu, mpangi-bakala, samu ti beno kuzwa dibanza ya yawu.

[*Samu ti David kuzonzilaka na yina me tadila Yandi, mu monaka ntangu nyonso Mfumu na ntuala ya kizizi ya munu, samu ti yandi kele na diboko ya munu ya bakala, ti mu lenda ningana ve:*]

[*Na yawu ntima ya munu kusepelaka, mpe ludimi ya munu kuvwandaka na kyese; mpe dyaka nsuni ya munu ke pema na kivuwu.*]

[*Samu ti nge ke bika ve moyo ya munu na difelo, to dyaka kubika ya Nge Santu kumona kupola.*]

411 Tanga nzila yina ke landa ntangu yayi.

[*Nge me sala munu kuzaba banzila ya luzingu; nge ke fulusa munu na kyese na mwandulu ya nge.*]

412 Yinga, beno tala. Ntangu yayi, nkundi ya munu ya Mbangi ya Yehowa, mu ke zola kuyufula nge na zulu ya yawu. Beno me mona? Kana difelo kele kisika, Hadès, Shéol, nyonso yina beno zola kubokila yawu, kana ya ke sukaka na ntoni, na yina samu na yinki Yandi tubaka, “Mu ke bika ve moyo ya Munu na difelo, to dyaka kubika ya Nge ya Santu kumona kupola?” Wapi mutindu samu na yawu? Beno me mona?

413 Awa nzutu ya Yandi vwandaka, na ntoni; mpe moyo ya Yandi vwandaka na difelo, na kulongaka, ya moyo! Wapi mutindu samu na yina? Yandi vwandaka dyaka na kati ya théophanie ya Yandi. Moyo ya Yandi vwandaka kuna na bantu yango yina vwandaka mpe na kati ya théophanie. Mpe vwandaka pesa bawu kimbangi, ti bawu “balulaka ntima ve na kilumbu ya mvibudulu.”

414 Yandi . . . Na mutindu yankaka, Yandi konkotaka na kielo. Mpe na yina byelo me funguka, mpe myoyo nyonso yango yina balulaka ntima, Yandi me tuba, “Mu kele Nkuna ya kento. Mu kele Yandi yina Enoch awa . . .” Kuna na Paladiso, kisika yankaka. Beno zimbana ve bisika yayi tatu, ntangu yayi: kisika ya bantu ya yimbi, kisika ya bantu ya kudedama, mpe difelo yawu mosi. Beno me mona?

415 Kaka mutindu butatu ya Mazulu, mutindu: Tata, Mwana, mpe Mpeve-Santu. Mutindu butatu ya kibulu: profete ya luvunu, kibulu, mpe—mpe kidimbu ya kibulu. Mpe nyonso yina, beno bambuka moyo, ya kele nyonso na butatu. Butatu ke salaka mosi, ya kulunga. Mosi kele ya kulunga. Beno kele ya kulunga, mosi na kati ya tatu: moyo, nzutu, mpe mpeve; maza, menga, mpe ba-

nerf. Beno me mona, nyonso yina beno kele, beno fwana baka tatu samu na kusala mosi ya kulunga. Beno baka kitini ya galasi yina kele na bansongi tatu mpe beno tula yawu na mwini, beno ke kuzwa mukyama ya kulunga. Beno me mona, nyonso, beno fwana kuzwa tatu samu na kusala mosi ya kulunga.

416 Mpe ntangu yayi, beno bambuka moyo ti, ntangu Yandi kufwaka, Yandi kwendaka ntete mpe longaka na myoyo yina vwandaka ve na boloko. . . bayina vwandaka na boloko, mpe pesaka kimbangi ti Yandi vwandaka “Nkuna ya kento.” Yandi vwandaka “Yandi yina Enoch kumonaka vwandaka kwiza na kumi ya mafunda ya basantu ya Yandi.” Yandi zolaka kupesa kimbangi na Masonuku yina longaka Noé, mpe Enoch, mpe na bantu ya kudedama, ti “Yandi vwandaka Yandi yina.” Nyonso zolaka bakula Yawu!

417 Na yina Yandi kulumukaka na difelo, mpe kuzwaka bafungula ya lufwa mpe ya difelo na dyabulu.

418 Me vutuka na Paladiso; mpe me nata Abraham, Isaac, mpe Jacob, mpe bantu ya kudedama; mpe me vumbuka (Matthieu 27), mpe bawu basikaka na ntoni mpe kotaka na mbanza, mpe talanaka na bantu na bala-bala. Alleluia! Beno bawu yayi!

419 Ntangu yayi, kasi nzutu ya Yandi. . . Na yina moyo ya Yandi vwandaka awa na kupesaka kimbangi na bantu yina zimbanaka, awa na yisi vwandaka baka bafungula na dyabulu, mpe vutukaka mpe nataka Abraham mpe Isaac; Moyoyi ya Yandi vwandaka ya kulala na. . . moyoyi ya Yandi vwandaka na yisi kuna na kusalaka yawu, mpe nzutu ya Yandi vwandaka ya kulala na kati ya ntoni. Ya kele samu na yina Yesu tubaka. . . Bantu ke tubaka, “Mbote, samu na yinki Yesu kutubaka, ‘Na bilumbu tatu, Mu ke vumbula yawu. Na bilumbu tatu Mu ke vumbuka.’? Yandi—Yandi kufwaka na Kilumbu ya tanu na manima ya midi, vumbukaka na Lumingu na suka.”

420 Kasi beno tala mbote, ya vwandaka “*na kati* ya bilumbu tatu,” kana beno baka lexique. Samu ti Yandi zabaka ti David, na yisi ya kupakulama (ya kupakulama ya Mpeve-Santu), tubaka, “Mu ke bika ve ya Munu Santu kumona kupola.” Yandi zabaka ti ya vwandaka tadila Yandi. Yandi zabaka ti ya zolaka kutuba Yandi. Yandi vwandaka Santu ya Nzambi, mpe Yandi zabaka ti kupola ke kotaka na bangunga makumi sambwadi na zole. Kisika mosi na kati ya bilumbu tatu yango, Yandi zolaka basika dyaka kuna, samu ti Masonuku lenda kufwa ve.

421 Mpe konso nsilulu na kati Kuna ke tadila munu mpe ke tadila beno, ya kele ya beno!

422 Yandi tubaka, “Beno bebisa nzutu yayi, mpe Mu ke vumbula yawu na bilumbu tatu.” Samu ti Yandi ke tuba, “Mu ke bika ve moyo ya Munu na difelo, to dyaka kubika ya Munu Santu kumona kupola.”

423 Yandi zabaka ti, na bilumbu tatu ti nzutu yango zolaka basika kuna. Yandi vwandaka ve bilumbu tatu ya muvimba. Ve, tata, kieleka Yandi salaka ve. Yandi vwandaka kaka kubanda Kilumbu ya tanu na manima ya midi tii Lumingu na suka, ata cellule mosi ve ya nzutu yango kupolaka.

424 Mpe Yandi kufwaka, mpe ba mbomaka, mpe vwandaka ya kulala . . . to ya kufuka na lele, mpe ya kutula na ntoni. Na yinsi yango ya tiya, ya maza-maza, ya zolaka baka kaka bangunga fyoti mpe Yandi zolaka pola. Beno ke pata- . . . kumatama, beno zaba, nzutu ya yandi, mbombo ya yandi ke kota mpe nyonso, kupola ke kota; yinsi yango ya tiya, ya madidi. Mpe ya zolaka kwenda na kupola, samu ti ya vwandaka nzutu. Kasi Yandi zabaka, ntete ti cellule yango kupola, ti Nzambi tubaka na nzila ya profete David, “Mu ke bika ve ya Muntu Santu kumona kupola.”

425 Mutindu Yandi bakaka Ndinga ya Nzambi mpe zingaka na Yawu! Ntangu yayi, mosi na mosi ya bansilulu yango na kati kuna yina vwandaka tadila Yandi, Nzambi lungisaka mosi na mosi ya yawu. Mpe konso nsilulu yina me tadila mukwikidi, Nzambi ke lungisa konso nsilulu ya Yawu. Amen. Beno ndima kieleka ti Yawu kele Kieleka. Amen. Na yawu, moyo ya Yandi . . .

Beno banza ti ya kele. . . Ve, beno lemvokila. Wapi kisika vwandaka Mpeve ya Yesu ntangu nzutu ya Yandi kuvwandaka na ndyamu bilumbu tatu?

426 Mpeve ya Yandi vwandaka na difelo, kuna na bizunga ya yisi; mpe Yandi vumbukaka. Mpe mu lenda bwela mwa—mwa kutuba mosi awa yina lenda sadisa beno mingi. Ntangu Yandi vumbukaka, ya Yandi . . . Ntangu Yandi vumbukaka na lufwa, kieleka Yandi manisaka ntete ve na kisalu ya mpulusu. Ya kele kieleka. Yandi zolaka sukula kima nyonso ya muvimba. Ntalu kufutamaka, kasi boma yango ya difelo, boma yango ya ntoni . . . Mpe awa, ntangu Yandi—ntangu Yandi kufwaka, Yandi landilaka. Yandi bikaka ve na kusala ntangu Yandi kufwaka, Yandi landilaka na kulonga! . . . ? . . . Beno lemvokila mutindu ya munu ya kusala yina kele mbote mingi ve, mu banza, kasi Yandi bikaka ve!

427 Beno ke kufwa ata mbala mosi ve! Nzutu ya beno lendaka pema mwa ntangu fyoti, kasi Nzambi ke vumbula yawu, Yandi silaka ti Yandi ke sala. Kasi beno lenda kufwa dyaka ve mutindu Nzambi lenda kufwa. Ya kele kieleka. Beno tala, ya Yandi . . . na manima Yandi kufwaka, na yina . . . ya kufwa landila bilandi. Yandi vwandaka ya kulala, yina Yandi vwandaka sala. Bawu tula Yandi na kulala; mutindu Yandi tubaka samu na Lazare, “Mu ke kwenda vumbula yandi.” Nzambi zolaka vumbula Yandi.

428 Beno tala, Yandi me kulumuka mbala mosi, Yandi me landila na kulonga. Mpe Yandi longaka na myoyo awa na boloko. Me kulumuka na difelo, me baka bafungula na dyabulu. Me vutuka

mpe me longa dyaka na Paladiso, mpe vumbukaka dyaka na kilumbu ya tatu. Talaka bantumwa ya Yandi bilumbu makumi yiya, mpe na nsuka ya kilumbu ya makumi yiya, Yandi mataka; samu ti, kima nyonso na zulu ya beto, balukwikilu ya luvunu mpe nyonso yankaka. . . Yandi ke zenga konso lukwikilu ya luvunu, konso ntembe, mpe ke sala nzila ya kisambu katuka ntoto tii na Nkembo na kutombuka ya Yandi. Yandi me mata mpe me vwanda na diboko ya kibakala ya Bunene ya Yandi. Munungi! Conquérant ya Nene, kieleka. Lufwa zolaka simba Yandi ve! Difelo zolaka simba Yandi ve! Ntoto zolaka simba Yandi ve!

⁴²⁹ Ntangu Yandi vwandaka awa na zulu ya ntoto, ba pesaka Yandi. . . Yandi kwendaka na mbanza ya yisi mingi mpe na bantu ya yisi mingi, mpe ba pesaka Yandi nkumbu ya yisi mingi. Ya kele yina muntu salaka samu na Yandi. Yandi kwendaka na Jéricho, mbanza ya yisi mingi. Muntu ya nkufi mingi zolaka kuyuluka na yinti samu na kutala Yandi na yisi. Ya kele kisika muntu ke tula Yandi. Yandi vwandaka boyi yina vwanda sukulaka bantu makulu, kusalu ya kulutula yimbi ti ba zolaka pesa. Yandi kumaka yisi mingi. Mpe ba vwandaka bokila Yandi na nkumbu ya yisi mingi ti ba zolaka pesa, *Béelzébul*, “mfumu ya bampeve ya yimbi.” Muntu pesaka Yandi nkumbu ya yisi mingi, kisika ya yisi mingi, mpe fidisaka Yandi na bizunga ya yisi mingi ya difelo ya yisi mingi.

⁴³⁰ Nzambi vumbulaka Yandi mpe fidisaka Yandi na Mazulu ya zulu mingi, mpe Nkumbu na zulu ya nkumbu nyonso. Alleluia! Mbote, Yandi zolaka tala, samu na kumona Mazulu. Kiti ya Nge ya mfumu kele ya kukembisa na zulu ya mazulu ya Mazulu. Mpe Nkumbu ya kulutula nene yina me bokilamaka na Mazulu mpe na ntoto fwana kuvwanda. . . kele ya kukangama na Yandi. Ya kele yina Nzambi salaka samu na Yandi. Muntu tulaka Yandi yisi mingi, mpe Nzambi salaka Yandi ya Zulu mingi. Kuna Yandi vwandaka, katuka yisi mingi na, ya Zulu mingi.

⁴³¹ Yandi kumaka yisi mingi ti Yandi zolaka nata beto na zulu na ya Zulu mingi. Yandi kumaka beto, ti beto na nzila ya lemvo ya Yandi lendaka kuma Yandi, bana ya Nzambi. Ya kele kisika Yandi kwendaka. Amen! Lusakumunu na Nkumbu ya Yandi. Yandi salaka nzilu ti beto lenda kwiza, mpe, kilumbu, “Samu ti Mu ke zinga, beno mpe ke zinga.”

⁴³² Oh, kukondwa ntembe. . . Ntangu muntu ke simba vision yango, ya me vwandaka ntete ve na muntu yina lendaka na kutendula yawu. Bawu me meka mpe na kutendula yawu, bawu zimbisaka dibanza ya bawu; nkunga yayi ya nene: “Oh zola ya Nzambi, mutindu bumvwama mpe ya kuvedila! Mutindu kukondwa luzabu mpe ngolo!” Nzila ya nsuka yina. . . to mu banza ya kele, nzila ya ntete: “Kana beto na mubu ya kufuluka na tinta, Mpe mazulu ya kusala buku; . . .” Beno zaba kisika ba talaka yawu? Ya vwandaka ya kusonama na kisika ya bilawu. . . na zulu ya kibaka na lupitalu ya bilawu. Muntu ve lenda

tendula Zola yango ya Nzambi. Oh, ba lenda tuba yawu ve, yina Yandi salaka samu na beto. Oh, wapi mutindu beno lenda tula lukumu mosi kuna? Ya kele lemvo ya Yandi, katuka mbandukulu tii nsuka. Mu vwandaka ya kuzimbana, ya kufwa, mpe ya kukondwa ngolo, kukondwa mbote, kukondwa kima, mpe Yandi na lemvo ya Yandi me kwiza mpe me vulusa beto. Oh, la la. Ya kele ya Yandi. . . Ya kele Mfumu ya munu. Ya kele zola ya Yandi, yina kele bumbote ya Yandi.

⁴³³ Ntangu yayi beto kele na pene baminuti sambwadi mpe pene ya bakyuvu kumi na tanu mpe. . .

62. Nge ke banza ti ya kele ya kulunga samu na bakento na kusala kisalu ya bawu mosi na ngaanda ya dibuundu?

⁴³⁴ Yinga. Ya kele kaka kyuvu, kaka. . . ve kyuvu ya masonuku, kasi. . . Kieleka, yinga. Yinga, tata, beto nyonso kele bisadi kintwadi. Bakento kele na bisika ya bawu, mpe kieleka bawu kele na yawu. Yinga, tata. Beno sala kaka kisalu nyonso ya beno mosi yina beno lenda sala, mpe Nzambi ke sakumuna beno samu na yawu.

Mbote mingi, ntangu yayi beto mona:

63. Lemvo tendula butatu. Wapi mutindu Mwana lenda vwanda na diboko ya bakala ya Tata, na kusambilaka samu. . . na Tata, kana bawu kele ve bantu zole?

⁴³⁵ Mbote, nkundi ya luzolo, ya kele. . . ya kele—ya kele luzayikisu. Kana Yesu tubaka, “Munu mpe Tata ya Munu kele Mosi,” na yina wapi mutindu bawu lenda vwanda zole? Beno me mona? Ntangu yayi, bawu kele zole ve.

⁴³⁶ Kento mosi kilumbu mosi tubaka na munu, mpe mu vwandaka tendula yawu, yandi tubaka, “Nge mpe kento ya nge beno kele—kele zole, kasi beno kele mosi.”

⁴³⁷ Mu tubaka, “Kasi, Nzambi mpe Mwana kele mutindu yankaka na yawu, beno me mona.” Mu tubaka, “Nge ke mona munu?”

“Yinga.”

“Nge ke mona kento ya munu?”

“Ve.”

⁴³⁸ Mu tubaka, “Na yina, Tata mpe Mwana kele mutindu yankaka; Yesu tubaka, ‘Ntangu beno ke mona Munu, beno ke mona Tata.’” Beno me mona?

⁴³⁹ Tata mpe Mwana. . . Tata vwandaka Jéhovah ya Ngolo nyonso (Nzambi) kuzingaka na tabernacle ba bokilaka Yesu Klisto, yina vwandaka Mwana ya Nzambi ya kupakulama. Yesu vwandaka Muntu, Nzambi kele Mpeve. Mpe muntu ve me monaka Nzambi kilumbu mosi, kasi kaka Mwana me basika na Tata yina me lakisa Yandi. Yandi vwandaka. . . Yandi. . . bumuntu ya Yandi, nkadulu ya Yandi, Bunzambi ya Yandi,

nyonso yina Yandi vwandaka, Yandi vwandaka Nzambi! Yandi vwandaka kima kaka ve to kima kulutila ve na Nzambi. Kasi, Yandi vwandaka Muntu. Yandi vwandaka Muntu, yinzo na kati ya yina Nzambi zingaka. Ya kele kieleka, Yandi vwandaka kisika ya Nzambi ya kuzinga.

440 Ntangu yayi, kana beno zola mwa Masonuku na zulu ya yawu: Mpangi Neville, kana nge lenda baka samu na munu Santu Marc 14:62. Mpe Mpangi-kento Wood, nge baka samu na munu Éphésiens 1:20. Muntu yankaka kele na Biblia? Mbote, beno telemisa diboko. Mpangi-kento Arnold, nge kele na mosi na manima kuna? Mbote mingi, baka samu na munu Actes 7:55. Mbote mingi. Marc 14:62, Mpangi Neville; mpe Mpangi-kento Wood ya kele Éphésiens 1:20; Actes 7:55, Mpangi-kento Arnold.

441 Mbote mingi, nge me kuzwa yawu, Mpangi Neville? Mbote mingi, tanga ntangu yayi. [Mpangi Neville ke na kutangaka Masonuku—Mu.]

[Mpe Yesu tubaka, Mu kele: mpe beno ke mona Mwana ya muntu ya kuvwanda na diboko ya kibakala ya ngolo, mpe kukwiza na matuti ya mazulu.]

442 Mbote mingi, ntangu yayi, beno tala mbote mpova ya ntete kuna, Yesu tubaka, “MU KELE.”

443 “MU KELE.” Nani vwandaka MU KELE? Ya me vwandaka ntete ve na muntu na yinza nyonso yina lendaka tendula Yawu. Mpe. . . beno bayina ke tangaka ba-lexique mpe nyonso yankaka yina, ya me vwandaka ntete ve na muntu yina lendaka kubakula. . . Ya kele J-v-h-u. Mpe bizabi ya Hebreux vwandaka lenda ve kutanga Yawu. Divunda yango ya tiya kuna, kilumbu yango ntangu Yandi kutanaka na Moïse, Yawu vwandaka J-v-h-u. Na yawu bawu ke tangaka Yawu “J-o-h, Jéhovah,” kasi Yawu kele ve “Jéhovah.” J-v-h-u, beno me mona, muntu mosi ve zaba.

444 Mpe beno ke tuba, “Mbote, Moïse lendaka ve na kubakula Yawu.”

445 Yandi tubaka, “Nani mu lenda tuba?”

446 Yandi tubaka, “Tuba, ‘MU KELE’ me fidisa nge. MU KELE.”

447 Ntangu yayi beno tala mbote, *MU KELE* kele na ntangu yayi, ve “Mu vwandaka” to “Mu ke vwanda,” MU KELE. Ntangu yayi, Yandi tubaka, “Yayi ke vwanda lubambuku na bansungi nyonso: MU KELE.”

448 Ntangu yayi beno tala Yesu ya kutelama awa na feti kilumbu yina. Bawu tubaka, “Beto zaba ntangu yayi ti nge kele na kilawu.” Bampova ya mbote kele, “Nge kele kilawu.” (*kilawu* kele “bulawu.”) “Beto zaba ti nge kele na bulawu. Nge kele Samaritain, nge kele na mpeve ya yimbi.” (Santu Jean, kapu ya 6) Mpe yandi tubaka, “Ntangu yayi, nge ke tuba ti nge kele. . . monaka Abraham, mpe nge kele ve muntu na zulu ya bamvula

makumi tanu?” (Yandi zolaka talana mwa ya kukula samu na mvula ya Yandi, kasi Yandi vwandaka kaka na makumi tatu, kasi kisalu ya Yandi.) Bawu tubaka, “Nge zola kutuba ti nge kele ve muntu na zulu ya bamvula makumi tanu, mpe nge ke tuba nge ‘monaka Abraham’? Beto me zaba ntangu yayi ti nge kele na bulawu.” Beno me mona?

Yandi tubaka, “Ntete Abraham kuvwanda, MU KELE.”

449 “MU KELE,” Yandi vwandaka MU KELE ya nene. Awa dyaka Yandi ke na kutubaka na ba-Juif yayi, beno me mona, “MU KELE! Mpe ntangu beno ke mona Munu kukwiza na diboko ya kibakala ya ngolo, . . .” Ya kele kieleka?

450 Tanga dyaka yawu, mpangi-bakala. [Mpangi Neville ke na kutangaka—Mu.]

[. . .*Ntangu beno ke mona Mwana ya muntu ya kuvwanda na diboko ya kibakala ya ngolo, mpe kukwiza na matuti ya mazulu.*]

451 Tanga ya nge ntangu yayi, Mpangi-kento Wood. [Kisika ya mpamba na bande. Mpangi-kento Wood me tuba, “Éphésiens 1:20?”—Mu.] Yinga, mama. [Mpangi-kento Wood ke na kutangaka Masonuku.]

[*Yina yandi me sala na Klisto, ntangu yayi yandi me vumbula yandi na mafwa, mpe me vwandisa yandi na diboko ya yandi ya kibakala na bisika ya mazulu.*]

452 Mbote mingi, tanga ya nge, mpangi-kento. Beno me mona, Yawu kele kaka mutindu mosi. [Mpangi-kento Arnold ke na kutangaka Actes 7:55—Mu.]

[*Kasi yandi, na kuvwandaka ya kufulukuka na Mpeve-Santu, tulaka meso na mazulu, mpe monaka nkembo ya Nzambi, mpe Yesu ya kutelama na diboko ya kibakala ya Nzambi,*]

453 Ntangu yayi, beno me mona, Ye- . . . Nzambi zolaka vwanda ve na diboko ya nene ya kibakala, beno me mona, mpe Yesu ya kutelama na diboko ya Yandi ya kibakala. *Diboko ya kibakala* zola kutuba “lutumu.” Beno me mona? Kaka mutindu, yinki kana—kana mu vwandaka ntwadisi ya nene ya dibuundu, to mu vwandaka mutindu mosi ya évêque, mpe Mpangi Neville me baka kisika ya munu, yandi ke vwanda na diboko ya munu ya kibakala. Beno me mona, yina zola kutuba ti yandi kele . . . yandi ke vwanda na diboko ya munu ya kibakala.

454 Ntangu yayi, Yesu kele na diboko ya kibakala ya Ngolo. Ntangu yayi, Yandi me tuba yawu, awa na Éphésiens, na yina yandi ke na kutendulaka yawu, Yandi kele na diboko ya kibakala ya Ngolo. “Bangolo nyonso na Mazulu mpe na ntoto” (Yandi tubaka, na manima ya mvumbukulu ya Yandi) “ya kele ya kupesa na maboko ya Munu. Mu kele na ngolo nyonso na Mazulu mpe na ntoto. Na yawu beno kwenda mpe beno longa bayinsi nyonso, na

kubotikaka bawu na Nkumbu ya Tata, Mwana, Mpeve-Santu, na kulongaka bawu na kuzitisa bima nyonso yina mu me tuma beno; beno tala, mu kele na beno ntangu nyonso, tii nsuka ya yinza.”

455 “Ngolo nyonso na Mazulu mpe na ntoto.” Wapi kisika ya kele. . . Kana ya kele na nzambi na zulu kuna na lweka yankaka ya Yandi, yandi kele ya kukondwa ngolo. Beno me mona, ya lenda vwanda ve na Nzambi yankaka. “Bangolo nyonso ya Mazulu mpe ya ntoto” kele na diboko ya Yandi. Na yawu, beno me mona, “Yandi kele ya kuvwanda na diboko ya kibakala,” (mutindu muntu yufulaka na kyuvu), zola kutuba ve. . .

456 Ntangu yayi beno tala, nzutu. . . Nzambi kele Mpeve. Yinga, bantu yikwa ke bakula yawu? Beno tuba “Amen.” Nzambi kele Mpeve, Yesu kele Muntu, mpe Yesu vwandaka Nzambi yina me kuma nsuni. Yesu vwandaka. . . Beto zolaka mona Nzambi ata mbala mosi ve, beno me mona, Yandi kele Mpeve. Beno lenda mona mpeve ve. “Muntu ve me monaka Nzambi kilumbu mosi.” Muntu ve lendaka kumona Nzambi.

457 Mpe bika mu tuba yayi, “Beno me monaka munu ntete ve.” Beno me monaka munu ntete ve na luzingu ya beno nyonso, mpe beno ke mona munu ata mbala mosi ve. Ya kele kieleka. Beno ke mona nzutu yayi yina ke lakisa muntu yayi, yina kele na kati awa. Ntangu yayi, nzutu yayi kele ve na Luzingu ya Kukonda nsuka, kasi mpeve kele na Luzingu ya Kukonda nsuka. Nzutu yayi ke kulumuka, kasi ya ke basika dyaka na mutindu ya yawu, kaka mutindu mbuma ya blé ke kotaka na ntoto. Buklisto kele ya kutelama na zulu ya mvumbukulu, na zulu ya kusobisa ve. Mvumbukulu; Yesu mosi yina kulumukaka, Yesu mosi yango vutukaka. Kana beno kulumuka na nsuki ya mbwaki, beno ke vutuka na nsuki ya mbwaki; kana beno kulumuka na nsuki ya ndombe, beno ke vutuka na nsuki ya ndombe. Beno me mona, ya kele mvumbukulu.

458 Ntangu beno ke kudyaka. . . Mu yufulaka yawu na dokotolo, ntama mingi ve, Mu tubaka, “Samu na yinki ya kele ntangu mu vwandaka na bamvula kumi na sambanu. . . Ntangu nyonso mu ke kudyaka, mu ke vutula luzingu ya munu malu-malu?”

459 Yandi tubaka, “Ya kele ya kulunga.”

460 Beno ke kotisa ba-cellule ya malu-malu—ya malu-malu ntangu nyonso beno ke sala. . . nsuni ke sala. . . to madya ke sala ba-cellule ya menga, mpe cellule yango ya menga ke sala beno kuzwa ngolo. Ya kele mutindu beno ke zingaka. Na yina, kima fwana kufwa konso ntangu samu beno zinga. Konso kilumbu, kima fwana kufwa: kana beno kudyaka musuni, ngombe ke kufwa; to nyonso yina beno ke kudyaka; mpe mbisi ke kufwa; to—to blé ke kufwa, samu na kusala dimpa; mbala ke kufwa, ya ke sala mbala; mpe. . . konso mutindu ya luzingu; beno lenda zinga kaka na nzila ya kima yina me kufwa.

461 Mpe beno ke zinga kaka ya Kukonda nsuka samu ti kima mosi kufwaka: Yesu. Ve samu ti beno kumaka ya dibuundu, ve samu ti beno botamaka, ve samu ti beno ke ndimaka Kibuklisto; samu ti beno me ndima Luzingu ya Yesu Klisto yina basikaka . . . Menga yina basikaka samu na beno, mpe beno me ndima Yandi mutindu Mvulusi ya beno mosi.

462 Ntangu yayi, beno tala, mu ke yufula yayi. Mu zola kuyufula *beno* yayi. Beno tala yayi, ya kele kitoko. Ya lendaka vwanda ti mu me tubilaka na yawu na ntwala (Mu zaba ve) awa; na kulongaka bisika nyonso, beno ke zimbana yina beno ke tuba na mosi . . . bisika yankaka. Kasi, na yina, yinki ya kele . . .

463 Ntangu yayi, mu banza, Mpangi-kento Smith . . . Mu zaba ve kana mu zabaka Mpangi Fleeman ntama to ve. Mpe Tryphène, mu ke bambuka moyo na yandi ntangu yandi vwandaka mwana ya kento ya fyoti. Nge ke bambuka moyo na munu, ntangu mu vwanda vwandaka . . . mu vwandaka muntu ya fyoti, ya nkufi, ya ngolo; ya nsuki ya ndombe, ya kubaluka. Mu vwanda bulaka makofi. Oh, na yinza mu vwanda banzaka ti mu vwandaka muntu ya style. “Oh,” mu vwanda banzaka, “ya kele ve na muntu yina lenda bula munu. Ve, tata.” Kasi ba me vuna munu—munu na yawu, beno me mona. Kasi mu . . . Ntangu yayi, mu banzaka kaka, “Oh, la la.” Mu banzaka, “Kana beno lenda kutula kima mosi yayi na zulu ya manima ya munu, mu ke tambula na bala-bala na yawu.” Kieleka, kima mosi ve ke kwamisa munu. Mpe ntangu nyonso mu ke kudya, mu ke kuma nene mingi mpe ngolo mingi ntangu nyonso. Ntangu nyonso yina mu ke kotisa luzingu ya malu-malu . . . Mu vwanda kudaya chou, bambala, mpe madeso, mpe musuni, kaka mutindu mu ke salaka bubu yayi. Mpe mu ke kuma ngolo mingi mpe nene mingi ntangu nyonso. Mpe ntangu mu kumaka na pene bamvula makumi zole na tanu . . .

464 Mu ke kudya mbote mingi ntangu yayi ti mu vwanda kudyaka kuna, beno nyonso zaba munu, zaba yawu. Mu lenda kudya mbote mingi ntangu yayi, beto nyonso. Kasi samu na yinki ya kele, Mpangi Eagen, ti, kana mu ke na kudyaka dyaka madya ya kulutula mbote, mingi ya yawu, ba-vitamine mpe nyonso . . . Mpe mingi mu ke kudya, mu ke lemba. Mpe ntangu yayi mu ke na kukumaka muntu ya kununa ya mapeka ya kubwa, ya dibasi, mpe nsuki ke na kukituka mpembe, mpe maboko na mifutu, kizizi ke na kukota, mapeka ke na kubwa, ya kele mpasi na kuvumbuka na suka, mpe . . . Oh, la la. Samu na yinki ya kele? Kana mu ke vutula luzingu ya munu malu-malu ntangu nyonso yina mu ke kudya, na yina samu na yinki ya kele?

465 Kana mu ke na kubakaka maza na carafe na kutula na kopa, mpe ya ke kuma ndambu ya kifuluka, mpe kuna kubanda na kukulumuka ntangu nyonso na kisika ya kumata; mpe mingi mu ke tula, na nswalu nyonso yawu ke kulumuka. Beno bawu yayi. Mpe beno ke lenda ve na monisa yawu landila science kana beno

fwana. Buku yayi kele kaka kima yina ke monisa ti Nzambi kele dilaka; ya kele dilaka, Nzambi monaka beto kukwiza.

⁴⁶⁶ Beno biboba ya babakala, mpe beno biboba ya bakento, ya lenda vwanda ti ndambu ya beno—ya beno babakala mpe bakento ya beno lenda vwanda ya kufwa. Yina ke—yina ke sala kima mosi ve. Alleluia. Bawu kele kaka na lweka yankaka ya lele, ke na kovingilaka; kieleka. Mpe bawu ke mna kuzola dyaka kuvwanda na beno. Ya kele kieleka, kieleka, bawu zola. Bawu ke na kuzola dyaka kuvwanda kintwadi. Biblia ke tuba ti bawu kele, myela na yisi ya autel yina ke na kudilaka, “Mfumu, ti wapi kilumbu?” Beno me mona? Bawu kele ve na kitezo ya bawu ya kulunga.

⁴⁶⁷ Nzambi ata mbala mosi ve salaka beto Bawanzio, yandi salaka beto babakala mpe bakento. Beto ke vwanda ntangu nyonso babakala mpe bakento, samu ti beto kele kivangu ya mayela ya yandi mosi Nzambi. Beto lenda vwanda kaka babakala mpe bakento.

⁴⁶⁸ Kasi yinki ke sala yawu? Beno me mona, ya lenda vwanda ti beno ke banza na ntangu beno belamaka na autel, beno mpe bakala ya beno ya fyoti, beno tubaka ti beno ke baka mosi na yankaka mutindu kento ya makwela landila musiku mpe kuzinga kintwadi na kitezo ya santu ya makwela yayi, mpe ti balemvo ya Nzambi mpe nyonso yankaka yina, mpe kimbangi ya beno nyonso beno pesaka, mpe nsilulu ya beno yina beno kusalaka. Kima ya ntete beno zaba, beno ke banda na kutala, beno nyonso zole. Yandi vwandaka ya kutelama, mpe nsuki vwandaka lezima; mpe mama mpe mwa meso ya yandi, ya kitoko, ya ndombe, to meso ya bleu, to nyonso yina ya vwandaka. Oh, mutindu beno vwandaka tala yandi. Beno ke basika, beno ke tala papa, “Awa, mutindu yandi vwandaka vutulaka mapeka ya yandi”; mpe na manima ya mwa ntangu fyoti yawu ke banda na kubwa. Mama ke kuzwa nsuki ya mpembe, arthrite ke kota mpe nyonso yankaka yina. Mpe na manima ya ntangu fyoti, kento ke kufwa, to bakala ke kufwa.

⁴⁶⁹ Yinki ya vwandaka? Ntangu Nzambi me mona beno ya kutelama kuna, Yandi me tuba, “Ya kele yawu, ya kele mutindu mu zola beno. Mbote mingi. Lufwa, kota na kusalu, kasi nge lenda baka bawu ve kana mu pesa nge muswa.”

⁴⁷⁰ Oh, oh, mu ke banza na Job. Yinga, Nzambi vwandaka tala na yisi, Job zabaka ti Nzambi zolaka yandi. (Mpe beno tala yandi lenda ve kubaka beno.) Yandi tubaka, “Nge kele na yandi na maboko ya nge, kasi nge baka ve luzingu ya yandi.”

⁴⁷¹ Mpe kuna kima ya ntete beno zaba, mapeka ke banda na kubwa, mpe na manima ya mwa ntangu fyoti beno ke kufwa. Yinki kusalamaka?

⁴⁷² Ntangu yayi, na mvumbukulu ya ke vwanda ve na kima mosi yina ke lakisa lufwa. Ya kele ve na kima mosi yina ke lakisa

ntoto yayi, na yina. . . Beno me mona, beno vwandaka kula na luzolo ya Nzambi, beno kuzwaka luzingu. Na manima lufwa me kota, me kulumusa beno. Na kudyaka madya mosi mpe nyonso, na kunwaka mutindu mosi ya maza, nyonso; kasi lufwa ke kota. Kasi foto me bakama yimeni. Alleluia! Na mvumbukulu beno ke vwanda dyaka na luzingu. Mpe ya ke vwanda dyaka ve na lufwa, to na mutindu ya lufwa, to kununa, to bikata to nyonso. Bantu ke kufwa ve, beto ke telama na mutindu ya Yandi, ya kulunga kukondwa nsuka. Alleluia. Oh, mu. . . Yina ke sala muntu nyonso kulooka, kulutila ntangu beno ke kuma na mvula ya munu.

⁴⁷³ Na mvula ya munu kele, mu banza, ntangu beno, ke banza na yawu, kulutila ntangu nyonso. Beno kele kaka na mutindu yango ya kusoba, beno me mona. Ya. . . Beno ke banda na kukiuyufula, “Nyonso yayi kele samu na yinki? Yinki mu me sala?” Mu ke tala na manima na yisi awa, mu ke banza, “Oh, kyadi! Mbote, wapi kisika ya me kwenda, Mfumu? Munu yandi yayi awa, na bamvula makumi yiya na nana, na bamvula zole dyaka, mu ke vwanda na kati-kati ya bamvula nkama. Fiou! Mu kele kaka. . . Beno tala kaka na myoyo fyoti yina mu me nunga. Mu zola kununga mafuku mpe mafuku mingi.” Nzambi, sadisa munu.

⁴⁷⁴ Mu ke vwandaka na nsoni ya munu mosi na kukwiza na yinzo na konze. Mu ke banza, “Oh, kuyonzika me yela, mpe bisadi kele fyoti. Mafuku ya bantu na kati ya disumu mpe nsoni ke na kufwa konso kilumbu, beno kuwa lubokilu ya bawu.” Mu ke kwenda kuna na mbeto na nkokila mpe ke kuwa mwa mimpani yango ya mawa kuboka kuna na yinsi. Mutindu bawu ke belama mafunda, na kusosaka na kukanga munu, mpe—mpe na kutelamaka kuna na aéroport kisika ba zolaka kuzwa bamilitele kuna samu na kuvutula bawu, kaka samu na kuwa disolo ya Yesu Klisto.

⁴⁷⁵ Mpe awa beto lenda bondila, mpe kusamuna na mukanda mpe nyonso yankaka, mpe kuzwa kieleka bisika ya mbote samu na bawu na kukwanda, kusala bansaka ya mbote na kuyimba ya mbote, bawu ke kwiza mpe “*Ahhh!* Mbote, mu vwandaka banza ti nyonso vwandaka ya kulunga, kasi bawu kele ve ya lukwikilu mosi na munu.”

⁴⁷⁶ Oh, la la, bilumbu—bilumbu—bilumbu yikwa ya ke vwanda? Ya kele ve. . . ya kele ve mbote. Mpe awa beto ke losaka bankama ya byazi ya ba-tonne ya madya na poubelle, mpe bantu yango ke yamba yawu na kyese. Mpe bawu kele bivangu ya ntoto mutindu mosi beto kele. Oh, beto. . . Mbote, yina ke salama ve mutindu yina ntangu mingi.

⁴⁷⁷ Mbote mingi, ntangu yayi, Nani kele Tata? Tata mpe Mwana kele Mosi. Beno tala mbote, na ya Ntete ya Jean 5:7, Yawu ke tuba, “Ya kele na tatu yina ke pesaka kimbangi na Mazulu, Tata, Ndinga (yina kele Mwana). . . Tata, Mwana, mpe Mpeve-Santu: bawu nyonso tatu yayi kele Mosi.”

478 “Ya kele na tatu yina ke pesaka kimbangi na ntoto, ya kele maza, menga, mpe Mpeve.” Ya kele bima tatu yina basikaka na nzutu ya Klisto. Ba tobolaka lweka ya Yandi: maza basikaka, Menga basikaka, “Na maboko ya Nge mu me pesa Mpeve ya Munu.” Beno bawu yayi, ya kele bima tatu. Bawu nyonso tatu yayi kele ve mosi, kasi bawu ke *wisanaka* na mosi.

479 Tata, Mwana, mpe Mpeve-Santu; ya Ntete ya Jeana 5:7, ke tuba, “Bawu nyonso tatu yayi *kele* Mosi.”

480 “Maza, menga, mpe Mpeve ke *wisanaka* na mosi.” Mosi ve, kasi ke *wisanaka* na mosi. Na yawu Tata. . . Mpe kima kaka ti nzutu zolaka sala, ntangu Nzambi ke mona Yandi mosi, ti na nzila ya kitumbu nzutu yayi kulutilaka, ya kele na kuvu. . . kukanga kaka kuna, beno me mona. Ya kele ntangu Yandi ke mona Menga yango kutelama na kati-kati ya Yandi mpe lusambusu. Beno tala Ndinga ya Yandi, kutuba, “Kilumbu nge ke kudya yawu, kilumbu nge ke kufwa.” Mpe awa Yesu tubaka, “Mu. . . Kasi Mu bakaka kisika ya bawu. Beno me mona, Mu bakaka kisika ya bawu.”

481 Beno ke bambuka moyo na disolo ya munu nkokila yankaka yina kisika mu monaka vision ya kento yina vwandaka kieleka mbote ve yina vwandaka na kivinga kuna? Mpe mu vwandaka bedisa yandi, na kutubaka, “Nzambi, samu na yinki Nge lenda tsyamuna ve kisika yayi?” Na yina Yandi lakisaka *munu*, beno me mona. Mpe mu belamaka na yandi mpe mu tubaka na yandi yinki kusalamaka.

Ntangu yayi, yayi kele kyuvu ya munu ya nsuka.

64. Nge ke banza, landila Masonuku, ti ba-Juif ke vwanda. . . ke ndima Klisto kaka ntete Enlevement ya Dibuundu?

482 Mu—mu—mu ke kwikila kieleka ti Enlevement ya Dibuundu. . . Yayi kele dibanza ya munu mosi, beno me mona. Mpe kana beto vwandaka na ntangu, beto zolaka baka yawu, kasi ya me—ya me luta ngunga ya yivwa na nkokila ntangu yayi. Beno tala, mu ke kwikila ti ba-Juif ke yamba Klisto na Nkwizulu ya Yandi ya zole. Ntangu yayi beno bambuka moyo, samu ti muntu yayi kuzaba yayi, meso ya beto vwandaka ya kufwa, to, meso ya bawu vwandaka ya kufwa samu ti beto kuzwa kumona ya beto. Muntu nyonso zaba yawu, Masonuku ke zonzila na yawu. Ya kele kieleka? Paul ke tuba na beto ti beto. . . ti beto vwandaka ya kufwa meso. . . ti ba-Juif vwandaka ya kufwaka meso samu ti beto kuzwa Klisto. Beno me mona? Mpe beto kele olive ya mfinda yina ba me bwela na nzila ya lukumu ya bana na kati ya yinti.

483 Ntangu yayi yawu yayi dibanza ya munu, mu ke pesa beno kaka. . . Ba me lomba munu, “Nge banza. . .?” Ntangu yayi beno tala mutindu mu banza ya ke salama. Mu zaba ve. Ata nyonso ya kele, mu ke ndima ti na nzila ya lemvo ya Nzambi mpe kyadi ya Yandi, beto ke vwanda kuna; beno me mona, na nzila ya lemvo

ya Yandi, nyonso yina ya kele. Mu lendaka vwanda na lenda ve ya kutanga yawu, kasi beno tala yina mu banza. Mu ke kwikila ti beto kele na nsuka ya ntangu. Mu ke kwikila ti nsungi ya Bantu ya makanda ke suka kaka awa. Mu ke kwikila ti beto kele na nkangulu.

484 Mpe ntangu yayi ba-Juif; beno tala bima zole yina ke salaka ba-Juif ntangu nyonso yimbi: Bawu na kuvwandaka mpofo, bawu lendaka na kumona yawu ve; mpe samu ti Bantu ya makanda, samu na kima mosi, mbala mingi. . .

485 Mu zonzaka na Juif mosi na Benton Harbor, Mpangi-kento Smith, mpe beno zaba yinki yandi tubaka na munu? Kuna na mosi yango ya Israël. . . na bisika ya Israël kuna. Kyuvu yayi na yina me tadila kubeluka ya muntu ya kufwa meso. Mpe yandi tubaka, “Benolenda zenga ve ba-Juif. . . Benolenda zenga ve Nzambi na bitini tatu mpe kupesa Yandi na Juif; kusala Yandi Tata, Mwana, mpe Mpeve-Santu.” Yandi tubaka, “Benolenda sala yawu ve na Juif, beto kele ve misambidi biteki.” Yandi tubaka, “Beto ke kwikilaka na Nzambi *mosi*.” Beno me mona?

486 Mpe beno ke na kusalaka Nzambi tatu: Nzambi Tata, Nzambi Mwana, mpe Nzambi Mpeve-Santu; kieleka beno ke kufwa Juif meso kaka kuna, samu ti yandi zaba mbote. Yandi mbote kulutula yina. Yina ke sala beno musambidi kiteki kaka kieleka mutindu kusambila biteki kele, beno kele na banzambi tatu. Benofwana sala bawu Nzambi kaka mosi, ya kele ve banzambi tatu, ya kele bisalu tatu ya Nzambi mosi. Benome mona, Nzambi kusalaka na Butata, Yandi kusalaka na Bumwana, Mpe ntangu yayi Yandi ke na kusalaka na kilumbu ya Mpeve-Santu. Ya kele kaka Nzambi mosi.

487 Ya kele samu na yina ti beto kuzwa lutumu ya kubotika na Nkumbu ya Tata, Mwana, Mpeve-Santu; samu ti, ve na nkumbu ya. . . Na *Nkumbu*, ve na bankumbu; ve na bankumbu, to na nkumbu ya Tata, na nkumbu ya Mwana, na nkumbu ya Mpeve-Santu; kasi “na Nkumbu ya Tata, Mwana, mpe Mpeve-Santu.” Benome mona, na kubakulaka kaka Nzambi mosi yango na kuvwandaka Klisto. Benome mona, ya kele Nani ya kele, ya lenda vwanda mutindu yankaka ve. Benome mona? Mpe Masonuku. . .

488 Mpe—mpe na yina kana luzayikisu ya beto kele yimbi, na yina Pierre mpe bayankaka ya bantumwa tubaka kima ya luvunu; samu ti muntu nyonso na Biblia vwandaka ya kubotama na Nkumbu ya Mfumu Yesu Klisto. Muntu ve kubotamaka na “Tata, Mwana, Mpeve-Santu,” ya kele malongi ya Katolika. Mu lenda monisa yawu na beno na nzila ya bandinga ya bawu mosi, mpe ba-lexique ya bawu mosi mpe nyonso. Ya kele credo ya Katolika mpe ve—mpe ve malongi ya Biblia. Mpe muntu ve. . .

489 Mpe Ntinu ya Angleterre kubotamaka na Nkumbu ya Yesu Klisto. Pene ya bankama sambanu ya bambula na manima ya

lufwa ya ntumwa ya nsuka, ntangu ya vwandaka ntete ve ya kubokila Angleterre kuna, ya vwandaka ya kubokila “Yinsi ya Bawanzio.” Ya kele kisika ya katukaka, nkumbu yango. Yandi vwandaka ya kubotama na Nkumbu ya Yesu Klisto.

⁴⁹⁰ Yina ndimisaka yandi, vwandaka mwa nswini. Ntangu... Kana mu lenda banza, ve Santu Angelo. Yinki vwandaka nkumbu ya yandi, awa? Agadabus, Santu Agadabus, mu ke kwikila ya vwandaka, mu kele ya kundima ve na nkumbu yango, ntangu yayi. Kasi, na mutindu nyonso, yandi mataka kuna, mpe ba bakaka ndambu ya bayayi. . .

⁴⁹¹ Bawu bokilaka bawanzio yango samu ti, bantu yango mpe ba-Assyrien mpe nyonso yankaka yina vwandaka ya muvimba ndombe, mpe ba-Anglais yayi vwandaka na nsuki ya yinda, ya mpembe, ya kubaluka, ya nsuki ya mpembe, ba-Anglo-Saxon, beno zaba, na meso ya bleu. Mpe bawu tubaka, “Bawu vwandaka talana mutindu Bawanzio,” mpe samu na yawu bawu bokilaka yawu “Yinsi ya Bawanzio.”

⁴⁹² Mpe kisadi ya Mfumu kumataka kuna mpe vwandaka longa na ntinu ya bawu, mpe bawu vwandaka ya kuvwanda na kisika ya tiya ya nene, ya kufunguka. Mu vwandaka tanga disolo ya yawu ntama mingi ve. Mpe mwa ndeke mosi kotaka na nsemo mpe basikaka, mpe ntinu pesaka kyuvu, “Wapi kisika yandi me katuka mpe wapi kisika yandi me kwenda?” Beno me mona? “Yandi kotaka na nsemo, mpe beto me mona yandi, mpe yandi me basika na kukwendaka na mpimpa. Ya kele ve mutindu muntu ke kwendaka?” yandi tubaka.

⁴⁹³ “Kasi yinki yandi vwandaka ntete yandi kota awa?” tubaka mulongi, beno me mona. Yina kotaka ntinu; mpe suka yina landaka, yandi mpe yinzo ya yandi kubotamaka na Nkumbu ya Yesu Klisto. Ya kele kieleka.

⁴⁹⁴ Na yina yinki? Muntu ya ntete yina ba mwangisaka mwa maza to ba botikaka na mutindu yankaka na nkumbu ya “Tata, Mwana, Mpeve-Santu,” ya vwandaka na dibuundu ya Katolika. Mwa kumwangisa ya maza ya ntete yina kusalamaka, vwandaka na dibuundu ya Katolika. Mwa kutsyamuna ya maza ya ntete yina kusalamaka, vwandaka na dibuundu ya Katolika. Dibundu ya ba-protestant ntangu nyonso ke botikaka... na Biblia, bantumwa, vwanda kotisaka na maza na Nkumbu ya Yesu Klisto. Bisika nyonso. Beno kuzwa kaka kisika mosi kisika bawu vwandaka kima yankaka, beno me mona.

⁴⁹⁵ Ntangu yayi, na yayi, na ntangu ya nene yayi, ba-Juif lenda ve. . . Mu yufulaka rabbi yina, mu tubaka, “Rabbi, ya ke vwanda mpasi na nge na kukwikila na bapofete?”

⁴⁹⁶ Yandi tubaka, “Mu ke kwikilaka na bapofete.”

⁴⁹⁷ Mu tubaka, “Na Ésaïe 9:6, yinki ya zola kutuba, ‘Mwana mosi me butuka na beto’? Na nani yandi vwandaka zonzila?”

- 498 Yandi tubaka, “Yandi vwandaka zonzila na Mesiya.”
- 499 Mu tubaka, “Na yina Mesiya ke butuka?”
- 500 “Yinga, Yandi fwana butuka.”
- 501 Mu tubaka, “Na yina kana Yandi fwana butama, Yandi fwana . . . Yandi ke kuzwa mama.”
- 502 “Yinga, Yandi fwana kuzwa mama. Mpe Yandi fwana kuzwa tata, mpe,” yandi tubaka.
- 503 Mu tubaka, “Kieleka. Mpe ya lenda vwanda mpasi na nge na kukwikila ti ya lenda vwanda ve . . . ti Nzambi Yehowa ya Nene Yandi yina zibulaka Mubu ya Mbwaki, zolaka pesa ve lubutuku ya Bébé yayi na lubutuku ya mwense?” Beno me mona? Kuna yandi vwandaka.
- 504 Yandi tubaka, “Kasi beno lenda sala Yandi ve banzambi tatu.”
- 505 Mu tubaka, “Yandi kele ve banzambi tatu.” Mu tubaka, “Wapi mutindu ya kiwisa ke vwanda na Mesiya na Nzambi?”
- 506 Yandi tubaka, “Yandi ke vwanda Nzambi.”
- 507 Mu tubaka, “Ntangu yayi nge me bakula yawu. Ntangu yayi nge me bakula yawu, Yandi kele Nzambi.” Ya kele kieleka.
- 508 Na yina yandi mekaka na kutuba na munu, yandi tubaka, “Mbote, muntu yayi vwandaka muyibi, Yesu yayi ya Nazareth. Yandi vwandaka muyibi.”
- 509 Mu tubaka, “Rabbi, wapi mutindu Yandi vwandaka muyibi?”
- 510 “Mbote,” yandi tubaka, “masonuku ya beno mosi ke tuba ti ‘Yandi kotaka na bilanga ya blé na kilumbu ya Saba, mpe bakaka blé.’”
- 511 Mu tubaka, “Ntangu yayi, labi, nge zaba ya kulutila . . . mingi na Masonuku kulutila yawu. Masonuku ya beno mosi ke tuba ti ya kele ya kulunga, ‘Ya kele ya kulunga na muntu na kukwenda mpe kudya lutangu yandi zola ya blé, kasi kutula yawu ve na kati ya saki mpe kubasika na yawu.’ Musiku ya beno mosi, rabbi.”
- 512 Mpe yandi telamaka kuna mwa ntangu fyoti, yandi—yandi—yandi kwikilaka yawu, samu ti yandi—yandi pesaka kimbangi. Yandi tubaka, na manima ya mwa ntangu, yandi tubaka, “Mbote, yinki—yinki salaka ti meso ya Jean . . .” Yandi tubaka, “Wapi mutindu nge me sala yawu?”
- 513 Mu tubaka, “Na Nkumbu ya Yesu Klisto.”
- 514 “Uh.” Yandi—yandi zabaka ve; yandi tubaka, “Mbote beno lenda zenga Nzambi na bitini tatu ve.”
- 515 Mu tubaka, “Yandi vwandaka Jéhovah yina talanaka na nsuni, Rabbi. Yandi . . . Ya kele yina Yandi vwandaka, Yandi vwandaka Jéhovah na kati ya nsuni. Nkumbu ya Yandi mosi ya kimuntu, ya vwandaka Nkumbu ya mpulusu, samu ti

ata nkumbu yankaka me pesamaka na yisi ya Mazulu yina muntu lendaka kuvuluka, kaka na nzila ya Nkumbu yango ya kimuntu ya mpulusu: Mfumu Yesu Klisto. Ya kele kieleka. Yandi vwandaka Nzambi, Yandi kele Nzambi, Yandi ke vwanda Nzambi kukonda nsuka, ya kele kaka kieleka, Mfumu Yesu Klisto.”

516 Ntangu yayi, mu ke kwikila ti Bantu ya makanda ntama mingi ve ke...kufuluka ya nzutu ya dibuundu ya Bantu ya makanda. Byelo na kati-kati...Yesu tubaka, na Matthieu 24, (mu ke baka Disonuku mosi yango minuti mosi), Yandi tubaka, “Bawu ke mwangisa bibaka ya Jérusalem tii kilumbu ya Bantu ya makanda ke manisa.”

517 Ntangu yayi beno tala mbote. Ya pesamaka na Mfumu ya beto Yesu, na Matthieu 24, ti ba zolaka katula ba-Juif. Daniel tubaka, kuna na bilumbu ya ntama ya baprofete, yandi tubaka ti ya ke vwanda dyaka na basabala sambwadi yina ba kubikaka, samu na ba-Juif. Mpe Mesiya ke kwiza (Mwana ya ntinu) mpe ke pesa profesi na kati-kati ya balumingu ya ya makumi sambwadi, ya vwandaka bamvula sambwadi, ba ke katula Yandi na kati-kati. Beno tala mutindu kulunga ya vwandaka, Yesu kulongaka kieleka bamvula tatu mpe ndambu mpe ba komaka Yandi na kulunsi. Kasi ya kele na tatu... Ya ke kota mbala mosi na kyuvu yayi yankaka awa. Ya kele dyaka na bamvula makumi tatu na ndambu yina ba kubikaka samu na bawu, samu na ba-Juif. Ya fwana vwanda.

518 Ntangu yayi kana beno ke baka Apocalypse, kapu ya 7, Jean kumonaka nkama makumi yiya na yiya ya mafunda ya ba-Juif bawu nyonso ya kutula kidimbu, ya makanda kumi na zole ya Israël. Beno me mona yina mu zola kutuba? Kasi ya kele na kima ke salama, dyaka.

519 Ntangu yayi beno tala mutindu kitoko ya kele, ntete beto sukisa ntangu yayi. Beno tala mbote mutindu—mutindu ya ke salama. Ntangu yayi, ba-Juif yango kele na kati ya mpimpa.

520 Ntangu yayi, ba-Juif yayi awa, mingi ya bawu awa, kele kaka...beno zaba mutindu bawu kele, bawu ke simba bumvwama ya yinza. Mpe bawu kele kaka—kaka bantu ya mbongo, mpe ya kele kaka yina beno lenda basisa na yawu, beno me mona; mpe ya lunangu mingi, mpe ya mutindu yankaka, mpe zola ve kuwa. Kasi, ya kele ve bayina yina Yandi vwandaka zonzila, kana beno ke tala.

521 Ntangu yayi, Bantu ya makanda...Ntangu yayi beno tala mbote, ya kele dyaka na bamvula tatu na ndambu yina me bikana samu na ba-Juif yayi. Ntangu yayi, Yesu tubaka ti ba ke mwangisa mbanza ya Jérusalem na Bantu ya makanda tii kilumbu ya Bantu ya makanda...(Ntangu yayi, beno bayina ke kwikila ve na bilumbu, wapi mutindu samu na yina?)....Tii ntangu ya kilumbu ya Bantu ya makanda ke manisa. Mpe ntangu

kilumbu ya Bantu ya makanda ke manisa (ntangu ya Bantu ya makanda ke manisa), kuna mbanza ke pesama na ba-Juif. Mpe Yesu tubaka na ntwala ti nsungi. . . Yandi tubaka, “Ntangu beno ke basika mpe ke mona yinti ya bafike kubasisa makasa, mpe bayinti nyonso yankaka makasa,” Yandi tubaka, “beno zaba ti été me belama.” Yandi tubaka, “Mutindu mosi ntangu beno ke mona bima yayi kusalama, beno zaba ti ntangu me belama, na kielo; mpe ya kieleka Mu ke tuba na beno ti nsungi yayi ke luta ve kana ti bima yayi kusalama.”

⁵²² Ntangu yayi, bawu vwandaka tala mbote na yawu na nsungi yango, “Ya kele yina Yandi vwandaka zonzila.” Kasi ve!

⁵²³ Beno kuwa! Yandi tubaka, “Nsungi yina ke mona yinti ya fike kubasisa makasa ya yawu.” Ntangu yayi beno tala mbote, Yandi tubaka, “Yinti ya fike, mpe bayinti nyonso yankaka.” Ntangu yayi, na mutindu yankaka, “Ya ke vwanda na réveil ya yinza nyonso na ntangu yina.” Ntangu yayi beno tala mbote profesu yayi, mutindu yawu ke kota mpe ke kangisa kaka na mutindu ya kulunga. Ntangu yayi beno tala mbote. “Bayinti nyonso yankaka kubasisa makasa ya bawu, ke kuzwa réveil.” Yinti, ntangu yawu ke basisa makasa ya yawu, ya kele réveil. Ya kele kieleka? Ntangu yayi, muntu nyonso zaba, mulongisi nyonso ya bapofesi, ti yinti ya fike ke vwandaka ntangu nyonso ba-Juif. Beto zaba yawu. Ya kele ba-Juif. Ntangu yayi. . .

⁵²⁴ Mpe beno tala Joël, ntangu yandi zonzilaka na yawu, yandi tubaka, “Yina dikelele me bik, mangolo me kudya; yina hasil me bika, dikonko me kudya; mpe yina dikonko me kudya. . .” Kana beno tala, ya kele kaka kitutu mosi, na bitezo yankaka: dikelele, mangolo, dikonko. Ya kele kaka kitutu mosi, ya kele kaka na bitezo yankaka ya luzingu ya yawu. Ntangu yayi beno tala mbote, kitutu yango mosi bandaka na kudya na yinti yango ya Juif na bilumbu ya ntama kuna, yandi zengaka yawu, mpe ya bandaka na kudya mpe kudya mpe kudya mpe kudya tii ntangu yawu kumisaka yawu na musisa; kasi kuna yandi tubaka, “‘Mu ke vutula,’ tubaka Mfumu, ‘bamvula nyonso yina hasil kudya. Mpe Mu ke pesa bantu ya Munu kyese.’” Beno me mona? Ntangu yayi, ba me kudya yinti na yisi. Ba bwelaka Bantu ya makanda na yawu, ya kele kieleka. Mbote mingi, beto fwana basisa mbuma.

⁵²⁵ Ntangu yayi ntangu ntangu ya nsuka ke kwiza, ntangu beto ke kuma na nsuka (kana mu mona yawu mbote), Nsangu ya mbote kele: ya fwana vwanda na réveil ya nene yina ke salama.

⁵²⁶ Ntangu yayi, beno zaba ti dalapo ya ba-Juif kele dalapo ya kulutila ntama na yinza? Mpe ya vwandaka ya kulala bamvula mafunda zole, kulutila yawu, pene ya nkama makumi zole na tanu ya bamvula. Dalapo ya ba-Juif, mbwetete yango ya David ya bansongi sambanu, pepaka ve nkama makumi zole na tanu ya bamvula; na ntangu ya kunata ya—ya Babylone. Mpe ntangu yayi, samu ti Kimfumu ya Rome kuyalaka na zulu ya bawu

(mpe Mesiya kukwizaka mpe bawu mangaka Yandi), mpe ba mwangisaka bawu na mipepe yiya ya ntoto. Kasi beno zaba ti, na kilumbu ya sambanu ya Ngonda ya tanu, ya mvula 1946, ti dalapo yango kuvutukaka dyaka na zulu ya Jérusalem? Beno zabaka, na kilumbu ya sambwadi ya Ngonda ya tanu, na mvula 1946, Wanzio ya Mfumu kumonanaka na munu (kilumbu yina landaka) awa, mpe fidisaka munu na yinza nyonso samu na kunata réveil? Suka kaka yina landaka! Ntangu dalapo yango kutelamaka na Jérusalem, na yina mwini vwandaka kota na manima ya midi yango, Mbazi ya Mfumu kutalanaka awa na États-Unis na ngunga kaka mosi. “Ntangu beno ke mona yinti ya fike mpe bayinti yankaka kumena!”

⁵²⁷ Bantu yikwa ke bambuka moyo na Mbwetete yina vwandaka ya kukangisa awa na Nzadi ya Ohio, bamvula mingi me luta, ntangu Yandi tubaka. . . Beno tala dyaka foto ya Yawu, ntangu Yandi kulumukaka. Yandi tubaka, “Nsangu ya nge ke tekila mutindu muntu yina ke tekila samu na Nkwizulu ya zole, kaka mutindu Jean kutekilaka mutindu muntu yina ke tekila samu na Nkwizulu ya ntete.” Mpe, beno tala, bisika nyonso na yinza réveil me panzana. Makumi ya mafunda na bambala mafunda mpe mafunda, mpe réveil ya nene.

⁵²⁸ Bantu nyonso ya misiku, mpe bawu nyonso yankaka bisika nyonso na yinsi, mpe mabuundu ya nene ke tuba, “Bilumbu ya Billy sunday me manisa.” Kasi ntangu bawu ke mona dibuundu kubanda na kuvumbuka (bantu ya ntangu nyonso), bawu zolaka vulusa kizizi ya bawu. Charles Fuller zolaka baka kisika, kasi yandi vwandaka kiboba mingi; na yawu bawu kwendaka na Billy Graham. Mpe Nzambi me baka Billy Graham, to, yina dibuundu ya Baptiste kusalaka, mpe bawu nyonso vukanaka pene-pene ya yandi. Mpe Billy Graham kele ve mulongi ya ndambu mutindu Mpangi Neville kele, na yina ya kele na kuvwanda mulongi, ve na. . . ve, kieleka ve. Kasi yinki ya kele? Ba zolaka sala yawu, ya kele organisme, mpe bantu nyonso pene-pene kaka na yawu, bawu me vukana pene-pene. Billy tubaka kima mutindu mosi. Beno me mona, bawu zolaka sala yawu. Mpe ya zolaka salama samu na kulungisa Ndinga ya Nzambi. Bawu vwandaka ve na Mpeve samu na kuvukana pene-pene, na yawu bawu zolaka baka Ndinga samu na kuvukana pene-pene; ya kele mutindu bawu salaka. Mpe Billy kele mulongi ya Ndinga, mpe yina ke yitukisaka, mpe bawu vukanaka pene-pene; na yawu yina tulaka bantu nyonso ya misiku ya madidi na kuvukana ya bawu. Mpe Moyo yango ya Kimpeve, na kubeluka ya Kinzambi, mpe bangolo mpe bisalu mpe nyonso yankaka, na bimangu ya Nzambi, me tula yayi. . . Dibundu, Kento ya makwela yina me zanguka kele yina ke na Mafuta na mwinda ya Yandi, Yandi me kotisa Yandi na réveil. Beno me mona? Mpe dibuundu ya misiku ya madidi me kuzwa réveil ya yawu. Mpe awa Israël ke na kubalukaka na réveil ya bawu.

529 Mu kele na film kuna na yinzo ya munu ntangu kaka yayi, *Minuit Moins Trois*. Mpe beto kele na kizizi ya ba-Juif yango na kukotaka. Na kukotaka; beno monaka yawu na *Look* magazine. Mpe bamaswa, ya kufuluka, yina me katuka nzila nyonso na Iran mpe na yisi kuna; ba-Juif yango zabaka ve ti Yesu vwandaka na zulu ya ntoto, bawu kwendaka kuna na kunata ya Babylone. Ya kele kaka yina bawu zaba. Bawu vwandaka sala ntoto. . . beno monaka yawu na *Look* magazine to na *Life* mpe na bayankaka, kisika bawu vwandaka sala ntoto na bisadilu ya mabaya. Mpe ntangu bawu kumonaka bampepo yango kukwiza, bawu banzaka, “Yayi kele yawu,” samu ti Nzambi tubaka na bawu “bawu ke vwanda kuna, mpe ke vutuka na Jérusalem na mapapu ya ngononi.” Ya kele kieleka. Bawu yayi. Mpe ba-Juif kutubaka, “Yayi kele yawu.” Bawu kotaka na nswalu, mpe beto kele na bizizi ya bawu na bandinga ya bawu mosi, mpe ba yufuluka bawu; bawu katukaka yinza nyonso ya muvimba. Bayankaka ya bawu vwandaka nangula biboba ya bawu na manima ya bawu, mpe bayina vwandaka ya kufwa meso mpe bikata. Mpe bawu vwandaka basika na bamaswa na kukatukaka bitini nyonso yankaka ya yinza, na kukota.

530 Mpe bawu bandaka na kulokota matadi na ntoto, samu na kutula na basaki; mpe bubu yayi bawu me tala bayinto ya maza, ya kele yinsi ya kulutula, nene na bilanga na yinza. Mubu ya Kufwa kele na bimvwama ya kulutula na bayankaka nyonso ya yinza kintwadi. Ba-Juif ke na kuvutukaka; ya vwandaka ya kubumbama na Bantu ya makanda, kasi ba ke na kukula mutindu rose.

531 Ba tubakana ba-Juif yango—yango, bawu tubaka, “Beni ke na kuvutukaka na yinzo samu na kufwa.”

532 Bawu tubaka, “Beto ke na kuvutukaka samu na kumona Mesiya. Wapi kisika Yandi kele? Yandi fwana vwanda awa.”

533 Mpangi, ntangu beno ke mona yinti ya fike kubasisa makasa ya yawu, Yandi tubaka, “Nsungi yayi ke luta ve tii nyonso ke salama.” Beni tala réveil na bantu ya misiku. Beni tala réveil na Dibundu. Beni tala réveil yina ke na kwiza na ba-Juif, bawu ke na kutalaka mbote na nkwezulu ya Mesiya. Dibundu, Dibundu ya kufuluka na Mpeve, Kento ya makwela na . . . bamwense na mafuta na minda ya bawu ke kwenda na Madya ya Makwela.

534 Ba-Juif ke tuba, “Yayi kele yawu. Beni tala Nzambi ya beto yina beto vwandaka vingila.” Ya kele kisika nkama na makumi yiya na yiya ya mamfunda ya beno . . . kisika ba-Russelliste ke kotaka na poto-poto. Beni tala ba-Juif yango ya kutelama kuna bayina ke yamba Yandi. Bawu ke tuba, “Beni tala Nzambi ya beto yina beto vwandaka vingila.” Bawu ke mona Yandi, ke tuba, “Wapi kisika Nge me kuzwa yawu? Wapi kisika Nge me kuzwa bidimbu na diboko ya Nge?”

535 Yandi ke tuba, “Mu me kuzwa yawu na yinzo ya bankundi ya Munu.” Ya kele kieleka, “Na yinzo ya bankundi ya Munu.”

536 Yinki Yandi ke sala? Ba ke kotisa Dibuundu ya Bantu ya makanda na Nkembo mpe Kento ya makwela ke kwelana na Klisto.

537 Wapi mutindu Joseph kuzabanaka yandi mosi na bantu ya yandi? Yandi basisaka konso Muntu ya makanda na mvwandulu ya yandi. Kieleka yandi salaka. Yinki ke kumina na yina ke bikana ya nkuna ya kento? Dalago kulosaka maza na yinwa ya yandi samu na kusala mvita; Yesu tubaka, “ba ke losa bawu na ngaanda na kati ya mpimpa, mpe kuna ke vwanda na kudila mpe kunionga mpe kukwetisa meno,” bangunga ya nene ya bampasi mpe bakumekama ke kwiza na dibuundu ya Bantu ya makanda.

538 Yinki ke baka kisika kuna? Ntangu kilumbu ya mbingi ke kwiza, ntangu Nzambi me kabula nyonso na ba-Juif yango kuna, Yesu ke vutuka mutindu Joseph salaka. Ntangu bawu kuwaka Joseph, ntangu yandi basisaka mikengi ya yandi nyonso mpe nyonso yankaka, mpe yandi monaka ntwenya ya Benjamin mpe bayankaka ya kutelama kuna, mpe bawu ke na kubalulaka ntima na kufwaka Joseph. Bawu banzaka ti bawu kufwaka Joseph, mpe awa yandi vwandaka ya kutelama na ntuala ya bawu. Yandi tubaka, “Mu kele Joseph. Mu kele mpangi ya beno ya bakala.”

539 Kuna kieleka bawu kutekitaka, “Yandi kele Joseph. Ntangu yayi beto me zaba yandi.”

540 Ntangu Yandi ke tuba, “Mu kele Yesu. Mu kele Mesiya.”

541 Bawu ke tuba, “Oh, la la, ntangu yayi yinki beto ke baka!”

542 Ya vwandaka nyonso ya kusala samu na nkembo ya Nzambi. Ya ke vwanda ve ya Yandi. . . Mbote, bawu vwanda kuwa yandi kudila na yinzo ya mfumu Pharaon, Joseph kudila samu na bawu.

543 Beno vingila tii ntangu Yesu ke mona ba-Juif yango bayina Yandi zolaka kufwa meso samu na kubika beto Bantu ya makanda kuzwa siansi ya kukota, ya ke vwanda ngunga, mu ke tuba na beno. Yandi ke baka ba-Juif yango, beno tala ntima mpasi ve, ba-Juif yango ke kuzwa mpulusu. Yinga, tata, bawu fwana vwanda kuna. Mpe yina kele dibanza ya munu na yawu, mu ke mona dyaka yawu ve kisika yankaka na Masonuku. Beno fwana bika yawu tatu kintwadi, mbala mosi dyaka.

544 Beno bika mwense ya kulala, dibuundu kaka ya ntangu nyonso, ya lukwikilu, beno me mona. Beno fwana kuzwa dibuundu. . . Ya kele, ntete Juif, ntete Juif, ya kele kaka muntu ya kufwa meso yina ke na kuingilaka na lweka ya nzila. Beno fwana kubaka kudyata yina ke landa, ya kele mwense ya kulala, yandi vwandaka malembe na kusala, mpe basikaka kaka mpe vwandaka kwenda na dibuundu, mpe kumaka ya dibuundu,

mpe kieleka muntu ya mbote. Na manima beno fwana kuzwa Dibuundu, ya kimpeve, Enlevement, Kento ya makwela, kuna kento me telama. Bantu tatu yango, beno lenda ve . . . bawu kele ya kuvukana ve, ata fyoti ve. Bawu nyonso kele mutindu mosi ve. Ve yina ke tubaka ba-Témoin ya Jéhovah, “beno tala nkama na makumi yiya na yiya ya mamfunda kele Kento ya makwela”; ya kele luvunu. Ya kele ba-Juif, beno me mona. Ya kele na Kento ya makwela, ba-Juif, mpe mwense ya kulala. Mpe beno ke kuzwa bawu nyonso, mpe beno ke tuba, “Mbote, bawu nyonso tatu kele na bisika yankaka.” Bawu nyonso kele, bakalasi tatu ya mutindu yankaka ya bantu. Kieleka, bawu lenda ve.

⁵⁴⁵ Na yina ntangu Yesu ke vutuka na ntoto . . . Ba-Juif, yinki bawu kele? Bakala ya tóngu ya tempelo. Mpe ntangu Yesu ke vutuka, Yandi ke kwiza *na* Kento ya makwela. Yesu ke kwiza bambala tatu: Yandi ke kwiza mbala ya ntete samu na *kuwulusa* Dibuundu ya Yandi, Yandi ke kwiza mbala ya zole samu na *kuzwa* Dibuundu ya Yandi, Yandi ke vutuka mbala ya tatu *na* Dibuundu ya Yandi. Beno me mona? Kieleka. Na yawu ya kele nyonso nkwizulu mosi ya nene ya kulunga, ya kele nyonso Nzambi mosi ya nene ya kulunga; ya kele nyonso Klisto mosi ya nene ya kulunga; Dibuundu mosi ya nene ya kulunga, mpulusu mosi ya nene ya kulunga, . . . nyonso; ya ke kwiza butatu, kasi ya kele nyonso na Mosi. Beno me mona? Ya kele ve bantu tatu, ve tatu *yayi*; ya kele kaka Muntu mosi, Dibuundu mosi, Nzutu mosi, Klisto mosi, Mfumu mosi “na kati ya beno nyonso, mpe na nzila ya beno nyonso,” mpe nyonso mutindu yina. Nyonso na mosi!

⁵⁴⁶ Ti Nzambi kusakumuna beno. Mu me bumba beno ntangu mingi.

⁵⁴⁷ Kana Mfumu kuzola, ntangu yayi, kana mu lenda kwiza dyaka na bankokila fyoti, to nkokila mosi ya Lumingu to kima mutindu yina, kana pasteur awa kele ve na kima na ntima ya yandi, mu ke meka na kupesa bamvutu na bayayi awa. Oh, ya kele na bayankaka awa yina ke yitukisa. Bantu yikwa ke zola kuwa yawu? Oh, mu zola kaka yawu. Beno bika munu kubaka yawu dyaka, kaka kieleka na nswalu, ntete beto vutula kisalu na pasteur.

⁵⁴⁸ Beno kuwa kaka yayi:

Wapi kisika matadi ke mon- . . . ? Yinki ke monikisa matadi yango na Apocalypse, 21? Ya kele mosi ya mbote.

Tendula bibulu yiya ya Apocalypse 5. Beno tala mosi ya mbote dyaka.

Banani kele bakuluntu makumi zole na yiya? Beno tala mosi ya mbote dyaka, beno me mona.

Yinki vwandaka zola kutuba nsinga ya mbwaki ya Genèse 38? Beno ke bambuka moyo, yandi kwendaka mpe bakaka bokilo ya yandi mosi ya kento mpe zingaka na yandi mutindu ndumba; mpe yandi pesaka ntalu ya yandi mpe

yandi me kwiza; mpe na yina ntangu mwana kubutukaka, ba tulaka nsinga ya mbwaki na diboko ya yandi (yandi basikaka mpe dyaka yandi vutukaka), yankaka yina basikaka na ntwala ya yandi. Oh, ya kele mosi ya mbote; ya kele kieleka.

Wapi kisika ba ke fidisa makabu na yina me tala lufwa ya bambangi zole, na Apocalypse 11? Ya kele ntangu Moïse mpe Élie ke vutuka samu na réveil na nkama na makumi yiya na yiya ya mamfunda yayi. **Yinki kele makabu?** Beno tala mbote yina ya kele, ya ke yitukisa.

Wapi kisika ke vwanda basantu na manima ya funda mosi ya bamvula . . . (beno tala mosi ya mbote, bakala. Ke . . .) . . . **ntangu? Wapi mutindu ya nzutu ke vwanda na bawu?**

Wapi mutindu beto ke fundisa bawanzio?

Wapi mutindu ke kuma nsuki ya bawanzio ya Ntete ya Corinthiens? Na Buku ya Ntete ya Corinthiens. Bakyuvu mosi ya mbote, kieleka ya mbote.

549 Ti Mfumu kusakumuna beno. Mu banza ti Mfumu ke pesa beto muswa samu na kuvukana mpe kuzonzila na bima yayi, ya kele nyonso samu na nkembo ya Yandi. Beto lendaka wisana ve na zulu ya mabanza ya yawu; kasi mu ke tuba kima mosi, kana beno nyonso ke kuzwa kyese mingi na kuwaka yawu mutindu mu ke sala na kuzonzila na yawu, beto ke kuzwa ntangu ya mbote. Amen. Amen.

550 Mbote mingi, ti Mfumu kuvwanda kieleka mbote samu na beno ntangu yayi. Beno zimbana ve balukutakanu. Nsamununu ya Mpangi Neville, ntangu yayi, ya kele na WLRP, na Sabala na suka na ngunga ya yivwa; Neville kimvuka ya bantu yiya, mpe mu ke ndima ti bawu ke sala beno mbote, beno namisa mpe beno kuwa bawu. Mpe kana mu lenda, kana mu vutuka na ntangu, to kana mu mona ti mu ke vutuka, mu ke bokila kento ya munu; kana Mfumu pesa munu muswa samu na kwenda mona Mpangi ya luzolo Bosworth. Mu . . . Beno nyonso . . . mpe mu ke vutuka Lumingu na nkokila.

551 Ti Mfumu kuvwanda mbote na beno ntangu yayi. Mpe mpangi ya bakala, pasteur, kwiza kaka awa minuti; mpe ti yandi baka kisalu. Mpe:

Beno zimbana ve kisambu na dibuta,
Yesu zola kukutana na beno kuna;
Yandi ke baka mpasi ya beno nyonso,
Oh, beno zimbana ve kisambu na dibuta.

552 Beno zola yawu? Bantu yikwa ke sambilaka na yinzo ya bawu? Bika beto mona, beno nyonso . . . nyonso . . . Ya kele mbote, beno vwanda pene-pene ya Nzambi. Beno vwanda mbote, bana ya fyoti, Nzambi ke sakumuna beno.

Mbote mingi, Mpangi Neville.



BAKYUVU MPE BAMVUTU NA ZULU
YA HEBREUX KITINI YA II KNG57-1002
(Questions and Answers on Hebrews Part II)

BANDANDANI YA NDIATULU, NTUMUNU MPE MALONGI YA DIBUUNDU

Nsangu yayi ya Mpangi William Marrion Branham, kulongamaka na Kingelesi, na Kilumbu ya tatu na nkokila, na kilumbu ya 2 ya Ngonda ya kumi, na mvula 1957, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org